

四庫全書

史部

欽定四庫全書

史部

四川通志卷四十三

詳校官監察御史臣李陽斌

檢討臣德生覆勘

總校官編修臣王燕緒

校對官編修臣潘庭筠

謄錄監生臣周元梓

欽定四庫全書

四川通志卷四十三

藝文

疏

漢但望分巴疏

永興二年三月甲午望上疏曰謹按巴郡圖經境界南北四千東西五千

周萬餘里屬縣十四鹽鐵五官各有丞史戶四十六萬四千七百八十四百八十七萬五千五百三十五遠縣去郡千二百至千五百里鄉亭去縣或三四百或及千里土界遐遠今尉不能窮詰姦宄時有賊發督郵道集十日乃到賊已遠逃蹤跡絕滅罪逮捕證驗文書詰訊從春至冬不能究訖絕

憲未加或過德令是以賊盜公行姦宄不絕榮等
及隴西太守馮舍上谷太守陳弘說往者至有劫
間中令楊殷終津侯姜吳傷尉蘇鴻彭亭侯孫魯
雍亭侯陳已殷侯樂普又有女服賊千有餘人布
散千里不即發覺謀賊乃誅其水陸弁兵復害殺
郡掾枳謝盛寒咸張御魚復令尹尋主簿胡真若
此非一給史休謁往選數千閉囚瑣報或有彈劾
動便歷年史坐踰料恐失冬節侵疑先死如當移
傳不能待報輒自刑戮或長吏忿怒冤枉弱民欲
赴訴郡官每憚還往太守行桑農不到四縣刺史
行部不到十縣郡治江州時有溫風遠縣客更多
有疾病地勢剛險皆重屋累居數有火害又不相
容結舫水居五百餘家承三江之會夏水漲城壞
散顛溺死者無數而江州以東濱江山險其人半
楚姿態敦重墜江以西土地平曠精敏輕疾上下
殊俗情性不同敢欲分為二郡一治臨江一治安

漢各有桑麻丹漆布帛魚池鹽鐵足相供給而近
市師榮等自欲義出財帛造立府寺不費縣官得
百姓懽心孝武以來亦分吳蜀諸郡聖德廣被民
物滋繁增置郡王釋民之勞誠聖主之盛業也雖

貪大郡以自優暇不忍
小民顯隔謹具以聞

明劉蔭乞諡宋濂疏

臣聞之記曰節以壹惠諡以尊
名故生而有爵死則有諡周之

道也先王制治謂歆善而恥惡夫人之同情彰善
而瘕惡為治之要務如彼賢聖固無事於抑揚乃
若中人宜有待於懲勸故自成周至於今日率用
此道鼓舞士風蓋其節惠之法善善恒長惡惡恒
短德學有聞才節兼邵無他疵疾固宜與之美諡
尺璧而微瑕或瑕不掩瑜則節其善以為謚羣行
雖未有聞而一善不可掩則但取其善以為謚皆
以示勸也善泯而惡揚乃得惡諡則以示戒也故

雖孔文子猶得諡文而幽厲則孝子慈孫不能改也漢唐以下諡之善多諡之惡少本朝制諡有善無惡列聖愛惜人才忠厚尤至若夫小有過咎或遭謫謫則節惠之典例不復異以是坊士士猶有棄道捨弛法守以自速戾者然後知節惠之靳所以憂天下也然過咎有肯有怙則謫謫有幸有不幸罪出於怙誠不足矜罪出於肯宜若可宥故歐陽修以罪熙州郡去而卒猶諡文忠蘇軾以罪竄海外歸而卒亦諡文忠蓋修有文章兼有忠勞故宋薄其軹軾有文章兼有忠節故宋畧其過宋之遇士大夫亦庶乎先王矣國家肇基之初物色老儒於金華山中肯得宋濂濂之文學固高太祖之接禮亦厚備顧問則有裨補聖聰之益掌綸綍則有黼藻聖治之功講左氏傳則勸誘春秋論黃石書則請觀謨典語及軍賞以得人為規語及牛租以捐利為諷總元史筆削居多封功臣討論甚密

神仙之問謂此心曷移以求賢才袞冕之詞謂此服祇用以祀天地至云帝王之學獨衍義為要三代之治必仁義為歸厠歷有編受命之蹟可考辨姦有錄知人之鑒自昭寶訓作而詒謀燕翼之道傳祖訓序而創業守成之戒攸在律歷治之制度郊廟為之樂章紀初修事闕史志銘功德語協旂常屬之政事則辭屬之議論則不辭問之君子則對問之小人則不對誠惘惘於事行忠告寓於文詞是以前之勅符予之楚辭皆寵以全畫予之襲衣予之甘露悉出乎特恩賜坐於便殿而嘆其純賜飲於御筵而強之醉致任而留之左右為日甚久來朝而延之禁中為禮甚優辭則為之觴道塗去則為之慮夢寐受恩至此得君可知方為贊善之時茂修勸學之職讀書講究興亡之故謹禮請防言動之非稱於致父師之名褒賞侈舊學之翰故聖諭謂為聞國文臣之首而士論尊為問世儒

者之宗偶孫慎干紀於班行源亦連坐於桑梓法從末減猶安置於茂州天不慙遺遂喪亡於夔府既不蒙葬祭亦不蒙贈諡當時莫為之言蓋以為罪人也至今莫為之言又以為往事也臣惟我太祖昭代之聖君而源以學問文章為昭代之名臣顧以外至之愆逆廢身後之渾臣今獨為之追言則以為缺典也歐陽修蘇軾皆以得罪於宋或出或竄及其沒也宋以其一代文宗不以有罪而奪其諡源之文章實為本朝歐蘇當時得罪自其孫不自其身天地之大當見容也日月之明當見察也見容見察則漏泉之澤當見恢矣臣往年待罪言路欲言之而未及今者蒙恩承乏適濂之鄉郡故敢以源為言伏望聖慈追念濂為聖祖文學舊臣為本朝文章大家畧可赦之肯流非常之恩興久廢之事特勅禮官討論內閣畫一賜濂揚明之典則聖明彰善之政善善之心激昂人才之風光

輝文治之運一舉而兼得追跡先王矣宋
安得專美哉臣下情無任頌越仰望之至

薦兵部尚書劉大夏疏

臣惟歲天下之治功在賢才別天下之賢才在公論

寄天下之公論在科道科道者明賢辨姦遏惡揚善之門也科道之言同出於至公則初一姦惡而羣邪落魄薦一君子而士類揚若公道昭明忠良必遂天下未有不治者也苟或家立町畦人懷封畛好惡拂乎公論愛憎辟於私情則忠魂混淆邪正雜揉天下未有不亂者也昨者尚書馬文昇致仕會推員缺或薦或初衆議譁然其中亦有公論不明彈劾失實者臣不得不辯且如兵部尚書劉大夏臣不詳知其入嘗於兵部閱章疏見其敷奏有方心竊慕之及見先帝委任之隆陛下嘉留之切臣意一時之望也今乃有劾其有愧於先進之人謂不得與馬文昇相伯仲而亟宜黜退者則是

非乖謬亦甚矣昔我太祖皇帝謂建臣曰觀人之法即其小可以知其大察其微可以知其著視其所不為可以知其所為臣嘗奉此言以觀當代之士夫如劉大夏官至二品不為其子乞恩比之縱子庇壻者為孰優小者如此天者可知其子弟俱在原籍恪守家法寂無形跡比之縱容家人商販四方囑託衙門者為孰優微者如此著者可知歷官數十年其家不踰中人之產比之田連阡陌甲第通衢者為孰優其所不為如此則其所為可知矣夫以大夏持身如此而諸臣亦有斷斷不可之意則公論先晦於朝廷其何以服天下哉臣非曲為大夏辯說也但念天之生才甚難國家之得才尤難才用於時而能完始終之節為更難玷人之行如玷貞女臣竊為今之士夫不取也記曰古之君子進人以禮退人以禮今之君子進人若將加諸膝退人若將墜諸淵故馬文昇一人也有初其

懷姦欺罔者又有頌其勞績茂著者劉大夏一人
也有薦其簡質無私者有劾其清議師薄者甲可
乙否莫知適從昔漢御史大夫張忠誣奏京兆尹
王尊罪壺關三老公乘輿上書訟尊之寃曰一尊
之身三期之間乍賢乍佞豈不甚哉今一人之身
數日之內屢變其說此正所謂乍賢乍佞也陛下
從何聽信焉又謂閔珪有擠井下石之嫌者不知
擠誰於井謂劉大夏有蹊田奪牛之狀者不知奪
誰之牛逆其心若為馬文昇不平焉者殊不知文
昇官高一品壽躰八旬投閒兩老實惟其時亦惟
其願也荷蒙陛下厚其恩禮准其致任予奪之柄
悉在朝廷閔珪何能擠於井大夏何能奪之乎哉
如此言論大傷國體殊非治世所宜有者況今皇
上新政之初凡厥庶僚正宜同心一德共圖正理
却乃方底圓蓋批牾時政臣恐壞天下之公論惑
陛下之見聞生人心荆棘而使老臣不安其位人

主孤立於上故不得不為陛下詳悉言之也乞勅
吏部查勘閏珪劉大夏果有前項擠井下石蹊田
奪牛情繇宜從奏請罷黜如無此事亦宜究治造
言之人使老臣得以安其位而行其志勿使負屈
於青天白日之下也更祈備查劉大夏歷官年勞
應否廢子緣由上請聖裁如果相應乞准其子一
人送監以為人臣盡節者勸如此則
言路正公論明人心服而天下安矣

鄒智欽崇天道疏

臣聞樂人之樂者憂人之憂而
食人之食者亦事人之事頃者

上天垂戒以警我國家山上無雲地下無雨自正
月至五月自北方至南方亦不可謂天地之小變
矣而中外大小之臣拱手熟視無一人肯勸一古
畫一計為陛下分憂者尚賴陛下克謹天戒不
違寧處下修政之令出罪己之言給音朝發甘雨
夕施天人交感信不可誣然臣於此方且為陛下

憂而未敢為陛下賀也何者天之於君猶父之於子子有過父怒之為之子者憂愁鬱抑痛自悔尤亦既稍釋其父之怒矣然猶未能改過遷善立身行道以大得其父之惟心以成大孝於天下而恃父之愛遽肆然於家庭之間為之廝養者食其主之食衣其主之衣聽其主之使令畧不思勸其主以為長久計視其主之憂不憂樂不樂若秦人視越人之肥瘠也長此不已日復一日則父之所以愛之者又將轉而為怒矣天天下之大父也陛下天之宗子也中外大小之臣陛下之廝養也今陛下方釋天之怒而中外大小之臣又不能建萬世之長策此臣所以寢不安席食不甘味為陛下長太息而不能自己也臣筮仕未久識練未深不敢枚舉以稽聖聽請獨以今日之急務為陛下陳之惟陛下虛心留聽焉一曰任宰相以亮天工臣聞體元者人君之職調元者宰相之事宰相之不可

不任不待智者而後知也陛下於宰相有闕必備有事必咨有殊恩異數必加亦云任矣然或改革一政進退一人處分一軍國重事往往出自內批名為陛下之獨斷其實一二人者挈其柄是既任之而又疑之也夫任則不疑疑則不任陛下任之而又疑之者豈不欲推誠以待物哉臣竊意其進身之初多出於私門不由於正路既有以致陛下之厭薄矣至於議事之時又容容唯唯若不能然忸忸倪倪若不敢然甘於模稜恬於伴食反不如一二人小人者明白果決足以了事此陛下所以一任之一疑之也臣竊以為過矣宋之英主無出仁宗夏竦懷奸挾詐辜負任使則罷黜之呂夷簡痛改前非力圖後效則包容之杜衍韓琦范仲淹富弼抱才氣有重望則不次擢之而慶曆嘉祐之治號為太平未聞一任一疑可以成天下之事也臣願陛下盡體元之職重調元之任孰為夏竦吾

黜之孰為呂夷簡吾容之孰為杜衍韓琦范仲淹
富弼吾權之凡官中府中之事無一不屬其統領
退朝之後召致便殿或賜坐或賜茶或給筆札使
條陳治國平天下之道不使一二小人者得以參
錯其間則天工於是乎亮矣二曰選諫官以聞天
聽臣聞天下之事惟宰相得以行之惟諫官得以
言之諫官雖卑與宰相等苟非其人曷足以稱厥
職哉宋神宗將定官制謂蒲宗孟曰御史大夫非
司馬光不可古人慎重諫官有如此者今之諫官
以軀體魁梧為美以應對捷給為賢以簿書刑獄
為職業羣居終日迹若鷓鴣間有以忠義激之者
則曰吾舌非不能言吾心非不欲言吾官非不可
言但言出而禍各隨之其誰吾聽嗚呼既不盡言
以稱其職而復引咎以歸於君有人心者何忍為
此而陛下亦安用之臣願陛下罷黜浮沈之輩廣
求風節之臣或令對仗彈呵或令入閣參議或請

對或輪對或非時召對接之以溫顏款之以厚語
使得展底蕪無少顧忌言有可採則次第施行如
不可採亦曲加優容而不之罪則天聽於是乎開
矣三曰收人望以協天心臣聞汲黯在朝淮南寢
謀正人君子之有益於人國也大矣夫以陛下之
聰明豈不知天下事必得正人君子而後可任哉
其所以不樂正人君子而反屈折之者非有他也
特以其所言則皆利於公室而不利於私家故小
人巧為說間以中傷之耳姑以臣所知者言之如
兵部尚書王恕元勳碩德撐柱天地顧謂其爵而
授之於桑梓之墟監察御史強珍忠肝義膽貫鏘
金石顧視其權而置之於田野之間他如章懋之
直亮林俊之剛方張吉之純雅或落之於空山或
疎之於部署或竄之於蠻烟瘴雨之鄉使其向日
之誠枝瘠於中而不得以遂此豈天所以生賢之
本心哉臣願陛下縮王恕之蒲輪駕強珍之驄馬

將林俊宰分居要近之地使各盡其平生以圖來
效則天心於是乎協矣四曰復祖憲以正天綱臣
聞范祖禹有言自古國家之敗未有不繇輕變祖
宗之舊也創業之君其得之也難故其防患也深
其慮之也遠故其立法也密後世雖有聰明才智
之君獨出羣臣之表然終不若祖宗更事之多也
我太祖高皇帝監前古之迷識禍亂之原凡寺人
之徒惟給事掃除之役不與一毫之政神謀雄斷
誠萬世聖子神孫不易之發也頻年以來舊章日
壞邪徑日開人主大權盡出此曹之手內倚之為
相外倚之為將十三布政司倚之為鎮撫伶人賤
工倚之以作竒技淫巧法王佛子倚之以出入宮
禁鎮國永昌等倚之以結怨於軍民其他耳目之
所不加思慮之所不及不可勝言者歐陽修曰宦
官之禍甚於女寵可不念哉可不畏哉臣願陛下
以宰相為股肱以諫官為耳目以正人君子為心

腹然後深思極慮定宗社生靈長久之計則天網於是乎止矣右臣前所陳四事皆今日最急之務而不可以緩者然深究其本則在人主之明理何如耳朱熹曰人主之學當以明理為先此萬古帝王之準的也陛下聖質高明聖學深遠豈不致力於明理之學而輿假於臣言哉然竊聞之侍臣之進講也指某章為某書訓某字為某義殊無反復論辯之功陛下之聽講也每歲有常月每月有常日殊無從容啓沃之益如此而欲明理以應事臣不信也臣願陛下披難窮之義理惜易過之春秋考之於經驗之於史會之於心體之於身一歲之間無一月之不然一月之間無一日之不然則所當為者不得不為所不當為者不得不去矣豈特四事之舉而已哉臣聞言切直則不用而身危不切直則不足以明道臣知急於明道固不暇於恤身惟陛下為太祖十五年艱難辛苦之業一畱意

馬則萬世幸甚臣干冒天威不勝恐懼待罪之至

回天變疏

臣伏觀今月初十日五鼓有大星飛流起西北亘東南光芒燭地蜿蜒如龍蛇

人馬辟易益陽不能制陰之象也臣竊惟陛下即位以來慷慨奮發恭儉勤勞擯斥宦官黜遠左道根究浮費裁抑冗員痛懲法王佛子大放珍禽奇獸凡天下之人所欲而未得所患而未去者以次罷行幾無遺憾宜其克享天心景星卿雲昭回霄漢今變異若此何哉臣反復思之無乃陰之當消者未消陽之當長者未長而陛下所以事天者猶未至昔孔子作春秋凡星變必書朱子修綱目凡星變必書所以垂萬世帝王之明戒也伏請詔書內一款天下大小衙門政務如有利所當興有弊所當革者所在官員人等指實條具以聞臣有以見陛下知前日登極詔書為奸臣所誤阻塞言路

物論囂然故復下此條以自解耳夫不曰朕躬有過失朝政有闕遺而曰利所當興弊所當革不曰許諸人直言無隱而曰所在官員人等指實條具以聞陛下之求言已不廣矣然欲興天下之利當求利之所以興欲革天下之弊當求弊之所以革欲正天下之衙門當自大衙門始臣請迺流汴源為陛下陳之夫內閣者天下之大衙門也以內閣之利言莫利於君子以內閣之弊言莫弊於小人小人不退欲弊之革不可得已君子不進欲利之興不可得已竊照少師萬安持祿怙寵殊無厭足少保劉吉附下罔上漫無可否太子少保尹直挾詐懷奸全無廉恥世之所謂小人也陛下留之則君德必不能輔朝政必不能修紀綱必壞風俗必偷天下之賢必有所觀望而不敢來天下之邪必有所盤結而不肯去上弊社稷下弊蒼生此弊所當革者也臣願陛下諷之再辭以全其體給之餘

祿以飽其欲放之田里以休其勞則天下之弊無不革矣再照南京兵部尚書致任王恕託志忠勤可任大事兵部尚書致任王竑秉節剛勁可寢大姦北直隸巡撫右副都御史彭韶學識醇正可決大疑世之所謂君子也陛下用之則君德必為之開明朝政必為之清肅紀綱以振風俗以淳天下之賢必拔茅而來天下之邪必望風而去上利社稷下利蒼生此利所當興者也臣願陛下安車以優其禮賜之手詔以重其行置之左右以展其蘊則天下之利無不興矣然君子之所以不進小人之所以不退豈無自哉大抵宦官之權重也漢元帝嘗任蕭望之周堪矣一制於弘恭石顯則不得以行其志宋孝忠嘗任陳俊卿劉昫矣一間於陳源甘昇則不得以盡其才李林甫牛僧孺客與高力士相為犄角而明皇之朝政不經貫似道丁大全與董宋臣相為表裏而理宗之國勢不振自古君

子小人進退之幾未嘗不決於此曹之盛衰也臣願陛下鑒其所既往謹其所未來大張英斷總攬天綱凡所以待宦官者一以太祖高皇帝為法凡所以任內閣者一以太宗文皇帝為法則君子可進小人可退而天下之治出於一矣陛下聰明冠絕百王神武震驚六合豈不知刑臣之不可以弄天綱哉然而一操一縱之間卒無一定之守者殆正心之功未之講也心者人之神明常為一身之主以提萬事之綱者也但其所發不能無天理與人欲之異耳發於天理則耳自然聰目自然明言自然當理發自然中節可以對越上帝而無愧何宦官之能惑發於人欲則一身無主萬事無綱儀狄之酒或得以甘吾之飲易牙之味或得以飽吾之嚼蘭台問頰之美夾林強臺之樂或得以蕩吾之目彼必投間抵隙以施其蒙蔽搬弄之術於不知不覺之中雖有聰明神武之資亦將日消月化

而寢失其本初矣欲進君子退小人興天下之利
革天下之弊正天下之衙門豈易得哉陛下早朝
後深居法宮其心之發於天理與臣不得而知也
或天理人欲交戰於胸中與臣不得而知也此全
在陛下自點簡自省察果天理耶則敬以養之如
芝蘭之必生果人欲耶則敬以克之如荆棘之必
盡則靜與天俱動與人合而宦官不敢惑矣蓋以
君子對小人言之君子為陽小人為陰以羣臣對
宦官言之羣臣為陽宦官為陰以天理對人欲言
之天理為陽人欲為陰所謂陽者當力扶之使之
日長所謂陰者當痛抑之使之日消陽日以長陰
日以消則所以格天者在是所以配天者在是所
以祈天永命者在是豈特天變之可弭而已哉臣
又聞今日中外之論有謂三年無改於父之道者
臣請論之君子之事天也如事親事親也如事天
天者理而已矣順理所以事天也事天所以事親

也豈有違天而可謂之孝哉古之聖帝明王莫如堯舜史臣贊舜之德曰重華協於帝宜其無一事不合於堯矣今以書考之舜去凶山堯之所未去也舜舉十六相堯之所未舉也舜之所以協堯者一順乎理而已舜之心豈異於堯之心哉苟徒泥聖人之言而不會其言外之意則前日之宦官亦不必擯斥左道亦不必黜遠浮費亦不必根究冗員亦不必裁抑法王佛子亦不必痛懲珍禽奇獸亦不必大放是誠何理也哉臣願陛下不惑於浮言不拘於淺見凡所以事先皇帝者一以事天為法可也臣三尺微命一介書生非不知言出而禍應計行而身危願以天變赫然可畏如此而中外小大之臣拱手熟視無一人敢為陛下言之是人心天理可磨滅也天經地義可斷盡也天下以為何如後世以為何如臣之痛心實在於此昔朱雲以槐里令而論安昌侯張禹梅福以南昌尉而論

大將軍王鳳孝宗詔監司郡守條具民間利病以聞而未盡極論其故以為宰相臺省師傅賓友諫諍之臣皆失其職而左右近習之臣陰執獨斷之柄也臣雖不肖蒙先皇帝採取叔拾作養翰林固非一令一尉之比豈敢汎汎若水中之鳧與波上下偷以全吾軀手惟陛下為太祖二十年艱難辛苦之業千萬世弘大靈長之統一畱意焉則天下幸甚臣不勝畏天命悲人窮之至

來知德辭官疏

奏為感激天恩恭陳謝悃自分哀朽不堪職任懇乞聖明俯容終老

山林以安愚分事臣繇本縣儒學生員中嘉靖三十一年壬子科鄉試第五名頻年計偕屢試屢職因父來朝患病母丁氏繼患目疾臣既鮮兄弟遂留家侍養未任及父母去世臣雖有欲任之心已非可任之年矣夫親存不能仕以養吾親親沒而竊升斗以養妻子臣不忍也既不忍負吾親而徒

仕乃負明時而徒隱臣不敢也因思先民有言未
得其位無所發施則講明聖人之學使其教益明
出處雖異推已及人之心則一也臣佩此言遂將
本朝纂修五經性理大全日夜誦讀又請周易見
諸儒皆以象失其傳不言其象止言其理臣愚劣
自知遠不及諸儒但思易乃五經之首象既失傳
則自仲尼十翼之後四聖微言祕旨已絕二千餘
年矣若不窮究其象則以訛傳訛何以謂之明經
經不明何以為士所係世道匪輕臣遂客蕩縣求
溪深山中反覆探索思之思之夜以繼日如嬰兒
之戀慈母數年而悟四聖之象數年而悟文王序
卦孔子雜卦數年而悟卦變之非始於隆慶庚午
成於萬曆己亥二十七年而後成書書既成臣亦
自知祖宗以來列聖相承寄莪棫樸之化皇上繼
紹豐芑熙洽之仁有一代之聖君必有一代之經
術天意不借才於異代故臣得窺易於一班非臣

庸劣自能悟易也辟之鳥鳴於春蟬鳴於秋乃天地化育使之如是非鳥蟬自能鳴也不然鳥蟬天地一蠢蠢者安能應期而鳴於春秋哉臣自易註成後四肢罷敝萬念反冷不復問人間事矣詎意四川督臣王象乾貴州撫臣郭子章會薦蒙吏部題覆奉聖旨來知德學行既優添注翰林院待詔欽此臣一聞報不勝惶懼臣章句腐儒擣擗弱植未嘗不謀學而學愧先賢未嘗不修行而行猶鄉人至於翰林乃名賢侍從之地待詔尤儒臣極榮之選臣何人斯敢覬於此且臣之齒今年七十有九青天蜀道白首龍鍾雖犬馬之戀不敢忘於江湖而麋鹿之性終難馳於廊廟伏望皇上憫臣之老不能出戶庭於臣之病不能登舟輿臣未嘗敢一日之勞於陛下不敢虛冒榮銜容臣仍以舉人終老山林庶臣於舜日堯天之下得遂為飛魚躍之性生為聖世之逸民老非明聖之棄物臣之榮

踰於三捷九遠臣之
感誓於魏華楊環矣

董翼孔廟缺典疏

題為幸學奉旨有期缺典及時
宜舉事竊惟古今道德之極莫

盛於孔子矣古今隆重之典亦莫盛於孔廟矣乃
議禮之朝不數而聚訟之口常禁二十年來竟有
所廢缺而不講者直至我世廟而始初舉之啟聖
祠之祀叔梁紇是也九十年來尚有所疎畧而未
周者又將待我皇上而始備舉之啟聖祠之不獨
祀叔梁紇是也粵自漢高帝迄宋初何代何君不
知有孔子哉而牲帛諡號止及孔子之身未及孔
子之先也世官世爵止下逮其所出而未始上逮
其所自出也叔梁紇齊國之封自大中祥符始而
名稱徒具典禮無聞迨我太祖開天國子宋謙言
之矣而兵戎倥傯未暇舉行孝宗嗣服侍講程敏
政言之矣而甲乙紛踰竟成寢閣肅皇帝禮樂中

興乃用輔臣張璠議詔立啟聖祠祀叔梁紇配饗
從祀濟濟一堂豈不稱殷禮哉惟是二臣建議不
緣尊奉孔子起見原為顏曾思位堂上父不應坐
廡下據子雖齊聖不先父食之禮求所以安處點
鯉無繇但得叔梁紇一祀可以配諸賢便可通祀
與之窮而叔梁紇以前當有為孔子崇報者不暇
計矣張璠稱引是說遂亦無所推廣致令世宗隆
禮孔廟之制猶未大備殊為缺然夫國家之事孔
子無不至矣猶是加恩所自僅及其父進之而伯
夏又進之而防叔俱泯泯無聞不得享封崇之榮
與樽俎之列臣實傷之臣謂防叔伯夏合照叔梁
紇一體追封奉祀壇宇無用別營第就啟聖祠倣
同堂異室之例增設一龕以防叔處中伯夏處左
叔梁紇處右或并稱啟聖公而以世次別之可也
或并稱公而酌定二諡而別於啟聖亦可也此禮
舉而孔氏父子祖孫並荷思綸並食國祭孔子在

天之靈庶幾用慰而朝廷之崇報孔子又寧有缺畧而不周至者乎或曰孔子之報與天無極猶當十世享之而臣不以為然也孔子稱周公成文武之德追王惟太王王季文王豈以素王而敢踰越耶司馬遷叙孔子世家亦斷自防叔伯夏為始則議禮而至防叔伯夏亦無容見少矣或又曰一切祀典必求其所表賢防叔伯夏無所著於春秋於禮何居而臣又不以為然也羽淵之血不可以配天乎孟氏之數公宜又安知視防叔伯夏為何似也且顏曾思孟大賢矣而視孔子則遠矣周程朱蔡大儒矣而視孔子又遠矣彼且以其父配孔子而享從孔氏而祀而孔氏祀享僅一啟聖而止無所加於諸賢諸儒何無等也不可解矣聖朝推思四品而下上及一世三品而上適有增加何秩然也聖賢分量豈啻祿位崇卑乃推思祀典一概而無所軒輊不可解矣臣子之官一品者思寵榮施

三世何優渥也而啓聖祠之封爵蒞獻祖以上不得與焉豈至聖先師反出保傅下耶尤不可解矣為孔子揚尊祖敬宗之心為萬世開綱常倫理之報非皇上隆師重道之首務耶抑臣猶有說焉契為孔子遠祖堯所使為司徒敷五教而進五品者此萬世教化之宗孔子道統所自來也視稼穡之稷教養開先並垂永賴應與歷代功臣祭典以湯武之故不便配享遂淪沒不祀何耶臣竊按太稷禮以后稷配春秋猶兩有事焉而明倫如契舜教所昉獨無處與明禋之末何草草也臣謂帝王廟傍宜有一祠別祀稷契如謂稷已與配別祀可省一契又不宜有專祠請闔里為之祭丁分官致奠如啓聖祠禮則功臣祭典之躋補塞而無滲漏而聖學淵源亦不至滅沒而無傳矣方今軍旅倉皇詎不得迂譚俎豆乃聖作昌期正典禮修明之日而臨雍在邇環橋人士觀聽新天子禮樂行且

雲集臣政無說而處此耶伏乞勅下該部集議具覆舉行應典臣不勝悚息待命之至

再議孔廟缺典疏

題為聖裔已沐殊恩孔廟宜修缺典謹用補牘再申末議以裨

典禮事臣昔為諸生時春秋二仲得駿奔啓聖祠竊嘗伏而思曰叔梁紇祀古未有也我列聖朝亦未之有也肅皇帝用輔臣張璠議創茲版禮昭垂簡冊焜耀千古詎非大聖人作為哉獨奈何防叔伯憂之未與也國家崇奉孔子何所不至而封爵俎豆不及三世竊有憾焉臣近筭言路得以言事皇上矣初夏入班行即擬一言以補典禮之缺而於時遠信初傳諉兵孔棘議禮固未遑也居無何而禮臣以臨雍請矣隨得歲外額加之旨臣於是幸學奉旨有期缺典及時宜舉一疏私心計俞論可旦暮邀也已奉聖旨幸學改期已有旨了祀典

先朝久定不得紛議該部知道欽此臣又伏而思曰皇上嗣服以來浩蕩之恩隆施廣運豈有靳於孔子之先亦惟是東事狼狽兵餉焦勞軍旅張皇無暇反俎豆事耳臣遂不敢復行陳瀆擬俟來歲之春王正月釋奠屆期言之即或巡方輪次廷遣先時陞辭拜疏未晚也乃今莅蒞數月而釋奠盛舉將轉盼至矣載讀東甯獻士錄四氏學中孔聞籍孔聞諫並以新命舉矣不愛實科目以寵孔氏子孫而獨受虛祝帛不以榮孔氏之宗祖豈孔子亦猶是俗情也不念其宗祖而第念子孫乎臣固知孔子之不然也年來接邸報時時見覃恩諸疏隨上隨下百餘年荆棘之墓盡表新阡數十載凋落之家悉叨曹監絕無有愛惜鄭重而不行頒給者何獨於孔子之三世偏吝此典而不得與於覃恩之例也通者皇上講席時勤開講必先謁孔子羹牆之見何處無之諸所陳說經書非孔子所口

按則孔子所手定也。陟降孔子誦讀孔子而孔子之王父曾王父竟不得霽封爵。俎豆之賜安在其為尊孔子耶？孝經稱周公大孝曰郊祀后稷以配天。宗祀文王於明堂以配上帝。中庸稱周公成文武之德曰追王太王王季文王。此可見周公之孝不獨在文王一配帝文王一追王矣。孔子素王也。豈敢擬於王制而通於所以稱周公祀后稷王太王之義則尊祖敬宗聖人論孝益倦倦焉。臣固知防叔伯夏之祀諒非孔子所不樂也。僅僅祀一叔梁紇而不及防叔伯夏其中豈無所缺然乎一切典禮定自先朝何敢輕議乃禮以義起隨時增定亦國家之所不禁也。即以叔梁紇之祀高皇所未定也。世廟固不嫌參酌而勅舉之矣。則防叔伯夏之祀雖世廟所未定者皇上又何嫌推廣而備舉之耶？況乎同堂異室簡而易行禮有增加事無勞費已。愚臣前疏中見在御前無敢贊矣。當此嵩

祝之辰萬國衣冠畢就輦轂倘蒙皇上俯采芻言
修舉曠典則孔子父子祖孫並沐思綸並享國祭
孔子在天之靈庶幾用憚而凡百有位誰非詩孔
氏書者又誰不懽呼忻忭倍鼓暢於祝釐之下哉
伏惟聖明裁察初下該部集百官會議如果臣言
不謬至聖孔子應得榮及三世孔子之曾祖防叔
祖伯夏應得與於封爵俎豆具覆上請詔令同叔
梁統一體崇祀則數千年缺事一旦舉行而我皇
上隆師重道之禮斯具無餘
歎矣臣不勝懇切待命之至

喻思恂劾權璫魏忠賢疏

臣惟自古宦官之禍釀於肘腋成於近習中於

官府貽於社稷而其原實起自一念無君無父之心憑藉一時易縱易逞之勢職守不敢彈乘興不敢斥萬一禁之不早仍復除之不嚴俾其拚飛於不可測決裂於不能救則歷覽前代之事可得縷

縋指也臣讀易至開國承家小人勿用心思人主
自為國家計猶且勿用小人以稔亂胎矧我皇上
實開中興之運承丕顯之基願以刑餘為周召而
令厲身薰體之人潛伏左右恣行威福闔宮咋舌
逆國寒心有如宦官魏忠賢者憲臣列狀以聞始
卑賤心性貪殘目不識丁巧能飾詐我皇上信以
為忠而莫辨其大不忠名之為賢而靡覺其大不
賢者良繇身雖毀撒衷甚奸回有時包藏小機小
變取皇上之敬欣又時假借小善小忠以干賞鑒
所以得冒居尊顯久服寵榮一任罔欺不露破綻
耳試跡其行徑教其罪辜在諸臣具奏之疏累累
不登亦既炯若列眉悉如摧髮其忠賢自造之孽
件件非虛亦既詭同風域慘如戈矛臣即喙喙再
陳更奚有重且鉅於二十四款者意我皇上朝經
電照夕震寔咸頓清黼扆之奸大洩神人之憤乃

猶然惜誅戮於豺狼加生全於蛇虺也臣竊仰窺
皇上天縱聰明原不難於詳察審聽性天英武又
何憚於勅罰明刑或者以忠賢請除俱實萬死難
逃茲且暫留要領徐膏斧鑕而不知從來邪惡之
在居側具未發也患人主之不知其既發也又患
人主之不斷故去惡莫若盡除賊病於需誠恐稍
墮優柔漸成牽戀迨後遷延時日忽然移易神情
雖百鍊之剛可化為繞指即太山之大可昧於蕞
糠一旦養成羽毛握定魁柄積盈無忌勝氣籠霄
而為我制者反來制我前欲我容者卒令我畏無
窮之禍有不甘言則加膝若假其噬臍拔山愈滋
其固蒂矣姑息養癰跼踟脂毒後即能悔何益之
有伏乞皇上揭日月之明用霹靂之手擬將諸臣
條上忠賢事蹟乘天道昭彰之會人情鬱怒之秋
通縣朝市布告多方或速付法司按情如律或驅
投荒裔除死須臾則禁廷清肅聖治精嚴於以保

國寧家以安中外皇皇疑畏之心以鞏二祖
十宗永永靈長之祚天下幸甚臣愚幸甚

歐陽調律建文帝編年崇祀疏

臣聞國於天地必有與立禮制是已

顧惟聖憲倫惟王定制直其常則稽古步趨惟恐
愆志值其變則因時補苴俾罔缺遺總祈於愜天
適宜人情故可以揆先後聖而合符可以俟千百
世而不惑相反正以相成變終不失其當耳幾見
有繼統立極之君如我建文皇帝者享國五年曾
不得惡一日之年號歎片晷之血食乎前者怵於
忌辭後者牽於因仍遂成二百餘年之缺典何以
厭天下人心而傳之後世無間也臣少嘗側聞父
教及聞國朝往陳相與咨嗟掩卷歎厥者非一日
矣比幸具數焉垣時從諸臣趨踰陵廟見佳氣鬱
蔥深美規拱恢遠卜世無疆而感前念又未始
不徘徊悵愴倍滋踴躍也臣伏惟皇上特憫未之

念耳皇上仁孝性生明斷天成使萬幾清暇猛念
及先朝闕事而慨然修補寧俟臣言畢哉臣是以
不揣迂陋遠望宸嚴竊未稽首反復陳之蓋自古
君雖桀紂不聞以失德削年主即幽厲非易姓不
以殄祀乃建文皇帝則太祖高皇帝之嫡孫也繼
統則正享國亦久廣厚仁明無敗度敗禮之失叔
姪相承又非改玉改步之變而始終年號不著廟
祀不舉前者猶謂怵於忌諱實非得已獨怪夫後
者卒於因仍遂使至今尚成缺典是皆膠泥形跡
未嘗就天道人情一會通之也夫致疑於人事即
咎建文皇帝以紛更亦何不可若問成祖以興師
其復何辭然當太祖闕乾定鼎之初我國家億萬
載丕基天有默注此廢興存亡之故皆有莫知其
然而然者且不觀建文皇帝曰惟恐殺我叔父之
言乎迨宮一焚而此棄之若遺彼亦置之若忘則
建文帝何罪於成祖成祖亦何憾於建文帝豈不

照照然於天下而無奈論世者之終固也然非獨
臣今日之言也見往牒中先臣言之屢矣亦非獨
臣子之心也成祖即以鑒諸死事臣之忠漸寬禁
令梅不及用練子寧矣至仁廟時嘉方孝孺等之
忠盡死黨禁矣孝廟時先臣吳臣忠請表祠諸臣
矣神宗皇帝登極即沛然嘉與諸臣建祠祀諸卿
矣夫未有念其臣而反遺其君者以此可諒成祖
之心并仰窺列宗之心雖遭時不同宅心無異善
繼善述若專有侍皇上所謂禮樂百年而後興待
聖人而後定者自非偶也比皇上覃恩普彼又褒
忠卹死屢養非常即如近者允浙撫臣之請亦已
卹方孝孺而錄其後矣豈思推臣庶反遺尊親試
思光宗皇考彌月善政人不忘忘即皇上秉彝以
東之居諸不受割以益之用永孝思而建文帝為
缺陷且因而湮祀典神明之肖竟同若敷之服恐
自光廟而上在天有靈俱不能無恫也况皇上方

加意制作簡命儒臣纂修兩朝實錄慨察盛事而坐大典久缺不及今修補更待何日故臣斷謂國史另編建文五年以昭統系無俟再計而廟祀不容不議者惟皇上乘師濟在列之日勅下是議無況守株無撓築舍毅然設誠而力行之庶幾質之天理而順揆之人情而安仰以承聖祖神宗之心術以慰孝子慈孫之願上可以補前缺下可以昭成憲近以快臣庶遠以信史冊至孝至仁至誠至斷衆美畢萃於里上一心究且誠感神明化孚異類華夏傾心變節効順皆理之自然桴鼓可必者一時萬世咸頌今主禮明樂備自今日媲美成康而文景不足適矣臣腐儒賤士豈宜輕干朝典獨積忱有日感時悽愴不忍當聖明不諱之世自甘隱忍且念轉盼即臣待幽黜之日失今不言恐終無言時用是齋戒沐浴焚香叩首先朝仰告二祖列宗然後拜疏上請世固有人輕而言重其人非

而言則是者伏乞聖慈矜憫愚陋而恕其狂悖之罪亟採臣言見之施行萬代瞻仰在此一舉竊謂皇上勵精初政實英大於此無迂闊視之使天下謂聖朝有缺事也臣于昏聽不勝戰懼迫切之至

請施卹鄉官保城殉難疏

竊惟天下不能保其常治而無亂但使人心之

忠義存什一於千伯則能支大廈於將傾何者蓋惟正氣能興起人心而旌恤之鼓舞更神耳奈何人心至今日若不知忠義為何物故自封疆有事以來士無鬪志人懷二心雖身受封疆位極寵榮者不免而以禦亂捐軀求之巖居川觀之士抑又難矣乃有無土而守無兵而戰為武夫之所不能為而死文臣之所不肯死如合州鄉官原任安定縣知縣董盡倫其人者真世之奇男子烈丈夫也臣等生同里井備聞父老之傳頌且身嘗受其庇而忍不據實為我皇上陳之蓋先是逆酋蓄謀突

發難於重慶一時守令望風鼠竄奸宄乘隙起
蹂躪郡邑勢如席捲而合固逼處虎吻且素為賊
所垂涎而側目者故渝城一據即首欲得志於合
自府吏蔡瑋受遣迫索州印如寄而賊目中無合
矣於時盡倫固自入山以來十餘年絕跡塵市者
也至此毅然解帶傾貲募族黨率子弟入城從知
州翁登彥之請共圍嬰城固守故治瑋詣城隍祠
曰吾當對神與爾印也乘瘡藉首神前急出袖中
錢錐立碎頭顱扶兩目而生啖其肉手刃其首懸
諸劇衢蓋自是而賊黨膽喪矣日與翁知州備謀
防禦一切除戎備揆據險集哨密偵用間以禦外
侮而清內奸者莫無遺力而嚮產以倡義醪金以
廣助社甲枕戈以率先尤勞怨不避艱危弗辭故
一時義士驚風奸人奪魄賊銳屢挫始終貽合以
安且助銅梁而銅之固解據安居而安之城復而
合以西北諸郡邑賴之藩屏翼衛者尤未易更僕

敬也自是合州威名為賊所憚賊出恠撤云有捕獲翁知州董卿官者許封侯再傳牌於合州安居銅梁定遠開牌之及三邑者皆傳號改元獨合州牌不書以有翁董二臣在也繼而巡道臣徐如珂知蓋倫滅賊志壯撤州欲盡倫援渝盡倫慨然領木州募兵以往嚴除抵江北元旦祭吾死事諸臣即厲聲罵賊誓不與俱生聞其時不審未遑子弟及其僕從皆力諫之不能止身先渡江直薄城下奮臂一呼殺賊頗多竟費志以沒矣賊疑且懼掠其僕詰問不已而其僕亦寧忍死竟不言生死也噫嘻蓋倫亦遵何德而致此哉蓋倫生而磊落不羈而進便為真循良退便為真肥遯故初令清水量移別駕每拂衣歸櫛以關中撫按屢薦崇寧祖持恩破格徵召起加二守銜仍管安定縣後以執法忤孝原又拂衣歸而僻處杜門即子民之失謁上司之絕遺一切謝絕日惟購書沈酣與處士

李作梁共期苦述不朽每歲入租時以贖族無私也此其滿腔熱血渾身是膽貫顯晦而徹始終對天地而泣鬼神蓋誠有自來非偶然也故臣等曾不避內舉薦之於先假令委使在封疆定能為國家効一臂之力而諱其用之今且無及矣此深山窮谷間者無不涕淚酸辛而忠臣義士不扼腕痛悼者豈情哉今以保城之功則知州翁登彥蒙皇上以督臣之所請擢居憲職增酬其勞以死事之義則興文縣張振德亦蒙允諸臣之請特予卹廕以旌其忠臣等竊謂盡倫一身已兼而有之且異乎當官而守上者廟堂之上定有以厚待盡倫矣兼聞其子董三知慷慨激烈大有乃父風以一書生雖不共戴遂領盡倫所部兵同食茶蘼共寢風露誓不殺賊不已無何遵義兵叛降賊三日後三知鳴鑼大呼諸兵故為責如約狀賊遂疑悉斬降兵首棄於城而降卒乃不為賊用蓋忠肝義

瞻父子一心求之今日豈非間氣獨鍾一門者乎
則優卹之典並及父子此亦天理人心不容已者
臣等得翁知州昭字備述盡倫之忠而惜天付完
節太速云見請入祀并申請卹典又陳其子三知
於道拔以僉書督兵亦知地方公道未嘗泯沒第
蜀道勞苦又南中見報不全義迫於衷不得不就
所備間縷陳上陳以聽廷議伏乞勅下該部查照
近例將董盡倫優賜旌卹并予謚廕以抒孤憤而
慰幽魂庶節以竒而益著典用隆而益彰將使四
海忠義之士聞之而感感則奮即全軀保妻子之
人亦聞之而愧愧亦奮當此四方多故不肖別具
肺腸賢者亦各受要領之口若朝廷再各此異數
別無激發忠義之術而大事去矣抑臣等固是而
有感焉何昔忠臣義士死不絕書今寥寥也蓋功
名富貴之徒賊至則抱頭避難賊退則攘臂爭功
甚而飾敗為成指害為利故武事之不振率由功

罪之不明以至於此如城都之圍久無生理賴撫
按諸臣出億萬生靈於半載湯火中為天子保西
南半壁此其竭力苦心首在撫按兩臣為無前元
勛應與賢王夾輔大志並寵褒非常不俟終日而
何以守常格知縣吳弘業屢出銅梁於陸危詳在
南北子民二揭而新任道臣徐如珂聞難急赴惟
恐後時間其措置兵餉朝夕拮据至廢寢食不覺
血枯髮白同知趙其杰報陞之日正蜀事洶洶而
其杰毅然勇往徵兵催餉利害自擔恐勞獨任判
官胡平表揀杖拯溺冒危涉險始終不憚此皆今
日難得者他若李大儒金富廉一素封匹夫自蒿
亂以來即傾貲募士裹劍更戰以至於今亦錚錚
佼佼當於古義陝中求之矣然亦據所確聞者如
此其餘未得盡知或知未真并乞勅行督撫按臣
一切查核功罪務極公極實勿漏勿冒力洗今日
套習益四海之大不乏忠義惟在廟廊之上實實

加意鼓舞而又重念西蜀被賊被兵交相戕害士紳小民元氣俱傷速如臣鄉臺省諸臣願其仁梁之棟等之言力主發帑拯急并斟酌一二歲間大蠲額餉以揀此才遺天下事尚可為也全在謀國

者當
意焉

王祥昌題為培養聖壽有道萬年疏

一人主之身非一人之身也

天地之所寄託元廟之所憑式四海九州之所託命也此其關係何如重而可以肩越視之先是宣傳本月初三日聖駕幸學大小臣工手額稱慶咸謂臨雍之典肇新天下之業煥發者司百執演習禮儀并清途灑道已非一日矣即履肩皓叟兒童走卒靡不踴躍歡呼且快覩六龍騰津水之波雙鳳振雲中之華矣不虞初一日木衙門傳奉聖諭謂聖躬患暑切暫且停止改在明歲舉行臣一聞

之不勝憂懼蓋以臣之事君猶子之事父父偶感陰陽之患犯寒暑之疾為子者自當汲汲皇皇進藥餌謀刀圭日以珍攝之方反慢陳於父前而後即安雖具天性然哉固亦職分宜爾也皇上固天下之大父也御體既稍有違和臣安得不進尊生之說以竭愚分乎蓋人有此身全以精神為本少有越深諸病生焉然病生有胎實疎多惑所致故養生論曰為人操弓共射一的的無不中萬惑重障以害一生生無不傷又曰洞房清宮括廢之機皓齒蛾眉茂性之斧總言多惑之為累也數年來臣叨列班行每瞻天顏之粹穆真是堯舜之丰姿今聞聖躬忽病鼻衄以臣愚妄揣毋尔水虧火旺或於房帷之間有未節與臣以為病有內因有外因外因者藥餌可療內因者恐未必全藉於藥餌也必皇上播然振省毅然獨斷勿令靡曼之色日停於前不見可欲使心不亂庶恬靜以養神清虛

以棲心不事藥餌而聖躬自安矣然此心最易耽
焉不觀覽書史則無所持循而聲色來是而感伏
乞皇上居紫禁中觀覽孔子年少戒色之論則臨
深履薄之念悚動矣觀覽孟子養心寡慾之論則
冲恬淡素之趣勃發矣如古之享國長久者自虞
舜百歲而後莫過於商高宗周文王然稽高宗之
養壽命也內焉恭默思道外焉不憚不濫不敢怠
違稽文王之養壽命也內焉穆穆敬止外焉修和
輯寧丰觀厥成是古帝王之保身皆澹泊明志寧
靜致遠運精神於有用之地而不耗於聲色之場
故綿壽永厯靡旣至今耳皇上試釋孔孟之言而
進高宗文王之芳矩則燕趙二八之奉自無所鍾
情而心志清明精神強固何患壽命不與虞舜比
隆哉然臣更有進焉皇上固通天下為一身者也
天下之壽命寄之皇上皇上之壽命亦寄之天下
必疾病疴瘵靡不相通關節脈理無處不貫乃可

以言培養之周爾單臣雖卑乃皇上之手足也此
鱗敢諫之士熱血常流玉階此亦天下之至忠也
豈終斯夫轉圜廷伏殞軀之士忠理常繞帝闕此
亦天下之至苦也豈終吞夫鉅典此而猶吝惜其
何以聯手足之誼而體羣臣庶民雖賤乃皇上之
四肢也山左之旱魃為災江南之馮夷作孽獨不
可議朕議獨以散弓遺乎金蜀額解之錢糧并已
完未完之數目獨不可盡留該省以充兵餉乎此
而猶七脅其何以聯四肢之誼而子庶民至內操
一節雖屬聖天子親衛之兵第宜列於禁城之外
不宜列於宮庭之間近日訓練銳銳喧聞豈所以
葆太和而凝清靜僅有不測天下事尚忍言哉儻
後至城外免其內操則親衛之兵既不缺乏而禁
轅之下又免伏戎不猶為培養壽命之大肯綮乎
諸臣言此章滿公車臣不過再為補牘以備培養
之一端爾冒昧上瀆宸嚴無非祈聖壽無疆遠臣

子岡陵之祝伏
惟採擇施行

李化龍平播疏

看得楊苗匪茹與國為仇萬姓荼毒三省震驚孰不以為不可以歲

月克者乃自出師以來甫三月有奇而元兇授首
黨與悉擒千年虎狼盤踞之窟一旦掃蕩無遺上
足以伸中國之威下足以洩生靈之憤其他狡黠
上司縱悍惡苗無不落魄亡魂西南半壁天下可
永無虞矣朝廷咸福與指授方畧所致斷非文武
將吏敢貪天功為己力者惟是各官兵暴露行間
勞苦萬狀不可不查敘也先是臣奉命入川賊知
罪在不赦已統兵深入有擒王劉叛之說遂破纂
江且逼重慶地方洵洵皆謂有長驅之志於時目
前兵力畧無可恃臣乃以計緩之一而調兵一面
移文詰責若未嘗絕之者賊果信之即具文求撫
且不西向臣因得以微調漢上諸兵急為之備其

時賊氣張甚川人畏之如虎臣登成都兵甫出門
欲投錦江不復肯東及聞纂江城守兵見賊來競
謀而走多投水者止餘二將與其家丁遂及於難
臣念漢兵心膽已碎土兵狐兔有情自非招客兵
不可因請調陝浙諸省之兵又念外兵之費甚侈
往來途次且生擾是不可於每省鎮止調一二千
多者三千共數省實僅陸二萬其餘仍三省及滇
粵上兵也然西南人見外兵來莫測多少以為天
下之兵皆至矣自是漢兵之氣壯而土兵之心亦
折無不樂為我用者時賊雖知調兵然以為虛聲
赫之如往日非實事也臣亦止在成都積糧治器
若無事然不復東賊亦不疑也兵且集臣移駐重
慶賊始知必剿頗肆衝突然我兵漸益未易得志
也臣又念兵以一路進既道狹不能容一有前卻
不可復振因分為八路又念路分而兵少賊厚其
陣以衝之敗矣因令每路皆三萬以上每一路皆

可以當其全師又念闕外賊黨多不可勝誅會兵部頒賞格至省重招降益推廣之但投戈者皆赦不誅臣又念兵無賞士不往會兵部當格首言得賊者即以其家資與之臣益推廣之克闕破屯各懸賞賞各以十萬計既川兵入關臣又恐其人自為心若九節度之師然因復委按察司張悌入總監之殺牲在盟務必得賊臣又恐賊事急詐降得之遽延至暑而漸深我兵不能久用今但急攻之有稱降者斬使焚書無為所結時湖貴之兵亦至屯下臣欲入營親監之會聞先臣之討臣恐營中遂懈情不可用因不待成服跪而草檄示以例應候代照常督兵有慢令者尚方具在令代中軍余德榮等再往監之臣又恐賊屯後易攻屯前難攻時請將墜屯下者各有分地因令以勁兵一技壁其前其餘併力於後臣又恐諸軍士爭趨賊財物或至亂行至有他虞因移文再四中禁臣又聞

營中流言水西目把尚不統賊恐漏軍情因移文
令其退劉水西上官懼撤其兵退而引嫌曰吾不
欲為亡播之續也時久雨兵士曰在泥淖中至六
月之初四而天忽晴初五日遂破其二城初六日
遂登其也賊已滅亡總計八路生擒賊首賊從一
千一百二十四名斬級二萬二千六百八十七顆
俘獲賊屬五千五百三十九名口招降播民一十
二萬六千二百一十一名口全活被虜男婦一千
六十四名奪獲馬牛七百六十七匹獲器械四千
四百四十四件是役也自賊破綦江至劉滅可一
年自進兵至滅賊百十有四日當八路對壘時上
漢兵既參差不齊請將領亦彼此觀望播人劫於
賊之積威人自為賊未易即克我各路又糧運艱
難時有脫中之呼臣日夜催督走使馳檄至數百
千即兩省撫臣各路鎮道亦靡不忘寢忘食或至
頭鬚為白總之諸文武知廟堂之意必欲滅賊故

鼓之即應勞之不怨誅罰之亦無敢囁嚅者倘更一月而賊不滅暑雨久瘴疫深戎兵自潰無問賊矣該臣會同巡撫貴州郭子章巡撫湖廣支可大巡撫偏沅江鐸議照國家方制萬里日所出入之邦悉為郡縣獨西南諸省不廢土司蓋亦曰因俗而治與之相安云爾二百年來此輩犬羊之性不堪馴擾亦時有之然未有若播酋楊應龍之公然叛逆者則何也蓋其地險其兵強其財力足以使鬼通神其聲勢足以呼羣嘯黨加以年來方寓多事九伐之旌未遑南指彼遂時時狂逞亦遂時時得志井蛙之見謂縣官真無奈我何諸羣不逞如楊珠楊明何漢良孫時泰輩矚其雄心或時有以公孫躍馬尉陀自王之說進者賊亦念騎虎勢不得下將曰寧死無且舉大名乎於是乎恣其狂圖淫怒以逞而破城殺將鷓起西南之勢成矣夫天下非小弱也九州四海兵非腕輟非乏也何賊逆

形未著皇上不忍遽觀之兵曰吾且舞于吾且解
網姑俟其悔過而與之相安於無事乃不謂兇人
之性不移也始天怒赫然斷在必剿夫斷而敢行
鬼神避之況此么麼者乎益自進剿之旨下尚方
之劍頌然後海內熊虎之師如雲而集陳紅之粟
蔽江而上智士陳謀勇夫効力火燎毛山壓卵賊
即欲不灰飛煙滅亦曷可得已臣等嘗即諸路之
功而評叙之在四川則搞木三峒賊黨以為三窟
謂天險不可升者也婁山關賊前門我所以由賊
所必爭者也海龍屯賊以為天造地設人跡所必
不能到兵力所必不能加者也三戰而三克之賊
力竭矣不亡何待夫賊黨自賊其地猶易與也惟
賊父子親在行間則諸賊人人致死難與爭鋒護
路到處與賊父子對壘最快者九盤子之戰賊思
其精銳以付朝棟令之從秦江進從南川回此其
目中尚復有官兵乎劉挺一戰而走之自是搗人

為之破膽尤快者諸軍壁海龍屯下連月不拔挺
至一日而克其二城賊遂滅亡至今羣口囂囂然
竟無敢沒其先登之烈者兵法無選鋒曰北綏於
諸路其選鋒乎則綦江路之功也臣嘗言破賊關
外宜招降謂多不可勝誅也關內宜疾戰謂師不
可老也安羅陶洪三寨生口以數萬計勝兵以數
千計令貪功者以大兵初入必且多殺以報捷勝
之則傷仁不勝則損威矣而該路坐受其降兵不
血刃自是一戰而斬郭通緒再戰而入崖門關三
戰而屢捷於木牛塘賊計無復之遂父子相哭而
上屯矣當其入木牛塘時川兵入關去屯尚遠湖
貴兵在關外絕不相聞吳廣以孤軍去屯數十里
而結營犯兵法之所忌而卒以得志自非其令嚴
而戰力當不及此後雖以講降誤事然有激而奮
竟以成功逆賊父子盡獲其苦終不失為全捷則
永合路之功也南川路最險最遠去屯可六七百

里賊以為官軍必不能從此進當馬孔英之未至也高折枝以一書生請自料上漢兵以往此因已雄偉不帶矣乃師期一月之前先擣官壩營以寒賊膽而撤回其龍泉之兵且以解思石之危其事甚奇其功甚大比進兵從真州入真人則華食盡漿以迎搗人則棄甲曳兵而走居然有三代氣象時諸將方欲候各路消息方入關折枝夷然曰若是則誰為當先入者策馬而前衆隨其後竟以三月初八日奪桑木關而據之臣用是以催各路尚有以四月入者令諸將皆折枝諸路皆南川滅賊當更速抵關而馬孔英至則文武相得如樂之和自是日日約各路攻圍有應有不應甚或以相誹詈而折枝不顧也分攻令下諸將爭走後門設路獨壁前門夫後門我易攻賊前門賊易衝我彼亦曰誰為宜當賊衝者蓋亦先入關之意乎破屯之後後門以二路更攻前門以一路搏戰日夜揮戈

人百具勇坐使賊自盡而逆黨無一逸者總之倡諸路之先作三軍之氣令黔師不得以賊強我弱借口而竟以奏功臣於該路文武蓋心折焉則南川路之功也在湖廣則偏橋一路江外為四牌江內為七牌皆五司遺種九股留苗盤據糾結乎其間四牌不掃即武騎千尊未易窺三渡也陳璘獨以一旅之師先掃四牌開我進兵之路用是烏江內賊黨寒心長坎瑪瑙青蛇三屯自昔以為險絕官兵所從未易得志者臣亦慮其難下今降之璘以為除惡務盡竟一鼓而升其巔殺戮數千臭聞十里時龍泉宵旆南兵亦已先克板角關至今白泥涓潭之間四牌七牌之苗遂無遺種非璘之力不及此該路漢兵少上兵多糧運少遊便成譟呼璘令嚴而法肅卒能使之用命而不為害迨至克關逼屯議設木柵製鐵牌以防賊逸其機智有足多者卒以入虎穴得虎子閩人絳女累累在俘良

快人意則偏橋路之功也貴州各路與川湖不同
其地近其兵少其餉乏其夷情反覆而非常其民
心搖惑而不定茲之用兵又非以一卒厲一鼓舞
之為競者烏江失律已見法矣然能借是以激勵
水西俾之絕狐兔之情踐虎狼之窟毋氏屯一戰
大足褫逆酋之魄而奪之氣此則失之武人得之
文吏益運籌者之苦心乎李應祥以孤危之兵當
艱危之時能自審於緩急進止之間以守為戰以
招撫為進攻卒之轉弱為強揚旌直指斬首數百
招降數萬因破諸屯斬三渡抵白田何其壯也竟
以合連川兵回心戮力破重城俘羣醜振積弱之
邦舒革夏之氣始如處女繼如脫兔茲其審於機
而神於用豈易得哉則平越烏江沙溪諸路之功
也夫我國家從來用兵未有夫得志於西南夷者
也國初傅友德統二十四將軍止言防守未聞戡
定正統間麓川之後用兵五十萬轉餉半天下陸

叙萬人三返而罪人竟逸嘉靖初思田之役以劉
始以撫終至今為諸夷借口茲其大致可觀已諸
帥因中庸人臣等三五書生耳其智畧才力不及
古人遠甚乃兵纔逾二十萬進兵纔逾百日費纔
二百萬而倖以成功此非臣等之力皆由我皇上
神武獨斷委任不疑用使文武同心將士効死爰
有成績臣每誦詔旨即十行之札萬里之外往往
曙於指掌而析於毫毛輒沾沾自得以為賊平矣
已戰勝於堂上矣夫淮蔡之平直
須一斷何況今廟謨詳一若此哉

敬陳播地善後事宜疏

查該州地鄰三省然楚止
偏橋路通一線蜀與黔益

無所不接壤夫蜀無藉於播黔瘠壤也若乘此時
而割播地以附黔則於蜀無損於黔有裨且臣等
別疏又請以楚之四衛並割附之從此黔省幅員
得與十二省比長絮大甚為永便但盡屬之黔則

地方千里諸凡締造勞費尚多亦然所不能堪因
議設為二府分隸黔蜀庶建邦啓上各自經營成
聚成都指顧可就皇上廓清之績既已盡被於三
藩而憚憚之仁又復再造於黔土矣除寬脇從撤
兵馬招流移厚賑恤抑兼併靖橫恣等項凡明旨
所叮嚀而兵部所條議者俱已陸續舉行尚有後
間款目謹集衆思列為十一事呈覽 一復郡縣
播州南極祥柯西連焚道東西廣一千二百二十
里南北袤一千四十里漢唐設為郡縣在川貴之
間亦一都會也至唐乾符間陷於南詔楊端取而
據之今逆苗既平相應改土復流以變夷俗及照
播州白田壩沃壤數百里即播州遵義縣故地當
復府治設縣附焉桐梓當綦南之衝走川貴道也
舊為夜郎縣故地當復一縣望犂南按發思北達
真涪為綏陽縣故地當復一縣仁懷濱播枕永謀
合帶盧為懷陽縣故地當復一縣真州即古珍州

川原平衍而叛周遊應復一州以上俱隸川省統轄黃平為川貴要區舊設撫苗通判一員列衛重慶駐鎮彼中其與播勢相控馭並為重地應設一府涪潭龍泉地理廣遠各應建設一縣甕水重安合設一縣餘慶白泥合設一縣昇草塘容山二司應割隸各縣以上地方去黔甚邇相應改隸貴州統轄總計增府二州一縣八益亂流初殄地闢人稀姑建數城以為繫屬以後地闢人聚無妨增設其二府治輿附郭縣分正佐首領各應照例全設外州縣正佐首領俱應量減一設屯衛揚州地方千里山川險惡夷漢雜居又邇鄰二大土司時有啟疆之志必須設官軍建屯衛以明居重馭輕之勢因設一衛於白田壩與府同城指揮使一員同知二員僉事二員鎮撫一員經歷一員知事一員所屬前後中左右五所每所正千戶一員副千戶一員百戶四員所軍各一千共五十衛所官於

從征有功者酌量陞授不足者於鄰近願入者調
取移實之其邊隅逼鄰土司地方各設屯田每軍
照祖制二十四畝再加六畝為冬衣布花之費共
三十畝卽自種自食不必納糧於官又復領出紛
紛滋弊各開屯處除養屯兵之外餘田仍照民地
起科上納木折於各州縣為衛官俸廩及不時軍
興之用每年孟冬仲冬孟春仲春農隙各屯官時
加操練又以十月二月望日齊赴兵備道大操三
日驗其武藝較其強弱而明賞罰焉老弱者汰之
一屯老弱多者並革其官軍田卽另募壯丁補伍
庶軍得實用異時卽募兵散盡此五千軍與主兵
三千自有八千可用之兵矣 一設兵備播地三
面環夷干戈甫戢當此經給草昧之始設立有司
可以招撫流凶或未能長駕遠馭而圖久安布置
將領可以備禦倉卒或易于生事微功而間邊釁
欲以內修戎備外攝夷心整肅羣僚整服衆志為

地方長久之計必設分巡兼兵備官一員於播州白田壩新建府城駐劄專一整飭新復郡縣并重慶衛忠烈二所永寧面陽石砭平邑等土司兵務兼理有司錢糧獄訟其重慶府巴縣綦江南川涪州武隆彭水切都地方悉聽管轄以便行事貴平新設一府四縣雖割屬貴州但人心初附田地畝連與貴州水西宣慰司並聽兼制一設將領播渝於夷閩八百餘年風俗曠僻法令扞格已久今地雖蕩平而遺孽潛藏漢夷錯雜招苗樹黨越界侵田時所必有今議播州番兵一萬黃平番兵三千粗足防守然必得一大將鎮之始可無事查得先年克平九絲議番總兵一員鎮守其地今建武視播稍緩卽一參遊足領之合無將軍門標下添設練兵遊擊一員改駐建武防守原設總兵移鎮播地應番各兵挑揀家丁三千買馬三百內標下標兵家丁二千七百馬二百七十以坐營千把總

領之兵道員下家丁三百馬三十以中軍領之有事俱聽總兵提調名為正兵此外兵七千酌量分布於白田壩真州柘梓等縣播川等驛防守內以一遊擊領三千以二守備各領二千各用千把總分領之有事征戰無事卽為築城鑿池建郡縣修郵驛之用糧銀照依舊例支發徐侯建置竣工日除家丁三千馬三百外餘軍以次議撤有願附籍當軍及民當差者聽千把總俱於附近衛所官內選用其黃平畱兵三千仍設一參將領之總聽防播總兵節制一丈田糧環播幅頓千里田地無慮數千萬畝舊時額糧止歲以五千八百石輸貴州蓋蠻方賦稅原輕至應龍巧立新法名曰等實每田一畝徵銀數錢初猶敘其財以招苗後並奪其地以養苗而賦法蕩然盡矣今旣改流自當責成道府親率州縣官插定疆界沿丘履畝逐一丈量分為等則造冊呈報以定賦法第額糧輕重蜀

無定規查克平九絲丈量田地分別上中下三等
每畝上田四升中田三升下田二升播地山水間
雜不止三等尚有上上下下者宜逐項分析最上
者一畝可當上田幾畝最下者幾畝可當下田一
畝則待臨時斟酌定難以預計丈完總計田地若干
糧若干徵本色若干折色若干候二年之外起科
除足一年夏秋二稅銀力二差一切雜費外餘解
布政司充邊餉支用 一限田制播土舊民自逆
酋倡亂大兵征討之餘僅存十之一二遺棄田地
多無主人冊籍不存疆界莫考復業之民往往冒
認影占原少報多原瘠報肥甚至一人占田一二
十畝尚有異省流徙假播籍而布冒充者今應將
播之舊民號榜保子者查果真的無論原業肥瘠
限人給田三十畝上中下操配均給若一處皆上
田皆下田者臨時酌給大率純下田不得多過一
百畝純上田不得少過二十畝其原非播民凡不

能為楊保語者無問曾否穿住皆不得妄認遺下
無主民田另行招人承種納糧當差應龍官莊並
揚北龍田一鵬何漢良等諸擒斬過有名頭人莊
田盡數沒官聽三省之民願占籍據州者承種其
領地之人查照時值量行上納以充日下建立城
池衙門驛傳諸費亦定為限制平人不得過五十
畝指揮千百戶不得過百畝俱於丈量時定糧定
價令不得那移州縣官收過絕產價值給付印契
登入循環聽兵備道稽查轉報撫按查考官吏乾
沒從重治罪一設學校擣故有學宋元之世復
度別興如丹從周猶道明白鏡之流俱登進士龔
薛上國自逆龍禁錮文字冠髻儒生坑儒橋書禍
同素始今干戈既戢文教宜先白田黃平舊有學
宮補葺亦易應當於二府原學各補教授一員訓
導二員至博士弟子員無論附郭外縣但入學使
之選者蜀新四縣隸白田學黔新四縣隸黃平學

待各縣人文漸盛物力稍紓嗣各立學未晚真州
既改為流其地方殷富人物道華亦須建一學宮
設一學正以示維新之化一復驛站揚州各驛
自逆首閉關負固驛官不敢赴任過客不敢經行
站戶逃徙館舍丘墟十數年矣茲者地方底定道
路大通驛站之設勢不容已查揚州舊轄松坎柘
梓揚州永安湘川烏江昌田沙溪仁水湄潭麓溪
水黃白泥一十三驛俱當用費孔道所有各該驛
館廳趁時興工合用匠役亦於兵夫內查有慣造
者徑撥不足者於附近州縣取用工食銀米計算
於該邊支利軍餉內動支仍責成新設府佐一員
往來稽督不許虛冒銀糧曠廢時日事完冊報又
查各驛夫馬支應及官吏俸薪舊額土司供辦今
既改土設流似應與腹裏驛站一體命派但流民
授田方始難便買馬行差目前一切站銀暫應官
為出辦俟里甲稍定即行編派至於夫馬額數應

照衝僻為準湘川驛附郭為四路最衝應設馬四
十匹夫八十名松坎桐梓播州永安四驛地衝路
險應各設馬三十匹夫五十名烏江仁水涪潭岑
黃麓溪白泥各驛俱次衝應設馬各二十匹夫各
三十名昌田沙溪止道水西次僻應設馬各十匹
夫各二十名各驛官見在者行令赴驛任事驛吏
因屬土司舊未撥發今應行川貴兩省布政司照
缺查撥 一建城垣播州一府一州四縣與黃平
一府四縣並宜改築石城石少者以甌代之其兵
備道總兵府并府衛州縣衙門公署倉廩庫獄城
隍廟演武場與二府一州儒學文廟殿廡齋舍等
項俱當以次修舉而各官一抵地方棲身為急衝
舍之建尤宜首圍各府州縣正官選委勤明佐貳
於堪動銀內行支剋期興工多方稽督大約城垣
以二十九年二月內起工限年終落成餘各以次
備舉就中員役有怠惰冒破工力草率者俱聽該

道詳叅擊完事竣之日造冊報撫按衙門奏繳庶
險要可資防禦有賴一順夷情播州皆夷也大
兵之後為賊用力者莫夷蘊崇已無遺種今見在
者曰各土司官曰七姓秦氏曰投降夷目皆宜安
插得所願就中情事不同亦宜分別如八司曰播
州真州白泥餘慶草堂黃平重安容山內安撫二
長官六一司覓水原無印信亦稱長官又有宣
恩同知羅氏此皆世有官號與播並建者播州長
官王積仁以附播被擒獻俘已與楊氏俱滅真州
附播多年蒸江之破助兵三百斷在耳目同知羅
氏與江水五司具疏改流批恩除禍致有今日之
事海內震動流血十里則諸司乃罪之魁也故說
者謂真州宜正其附播之罪江外諸司宜以通蠻
絕之第王道如天罰宜從輕賞宜從重真州當選
兵之初率先降附正副長官各領千人從軍江外
諸司各招兵聚義充黔楚鄉導今將真州正長官

卽為該州土同知副長官卽為州判官江外諸司
安撫與正長官卽為該縣土縣官副長官卽為土
主簿同知羅氏為新府土知事以外尚有投降夷
目原非長官本無冠帶但賞格外坐名開諭輒爾
先事歸誠亦宜少示眷酬以明悃信如上赤水里
頭目袁年父遭酷禍投降最早卽授以所鎮撫職
銜下赤水里頭目袁整仁懷里頭目王繼先安羅
二村頭目羅國名羅國顯安鑾以上五名念其延
誠歸正量授冠帶總旗諸人田產止將本身者暫
時抵給應納稅糧通附州縣官處上納其餘里人
俱令附籍納糧當差不許仍以家人為名恣行強
占違者治其前罪至於七姓奏民始助楊氏之亂
繼傾楊氏之族尤為禍首今蒙王仁寬宥外如仍
蹈故習豪橫害民該道徑行拏問發落地方人等
指稱前事告害者亦如之一正疆域播地東北
接連三省縣衛各有疆界無容涸清西南左營水

西右逼永寧雖犬牙相攬未能齊一然畫野分疆亦自有相沿界至惟是夷性互為雠長強則侵奪弱則滅削甚至有一地而甲乙互臨一人而齊楚兼事如儒溪沙溪水煙天旺皆播州五十四里之數見有黃冊可考緝麻山李博垣仁懷石寶瓊水等處亦皆播州世業祇緣先年楊氏中衰時曾被永寧水西侵占後應龍當事治兵相攻恢復故業各邊目又已任其糧馬兩下支持此在土司可畧今既改土設流自宜各復其故乃水西止求清查永寧輒行潰擾且動以瓜分為言罔上行私垂涎古業應行該道會同鄰近道分及早清查一切相鄰地方原係播者歸播原係永寧水西者歸永寧安刻石立碑永為遵守其鄰邊目兵如不安分義妄肆侵爭重行究治干礙王法一并參處

余文燿請速靖水蘭疏

題為水蘭渠魁就戮西南定局已成宜慎剷洗之畧

以連安攘之效事臣乞身歸省踰伏田間者四年
餘日聞虜賊負隅狂逞而逋寇奮崇明爪牙之先
事者苦於虎穴難探每謂餉不足兵不多曠日經
歲老師費財民膏日竭而賊焰日張岌岌乎莫知
所終矣幸督撫按臣新授方畧道臣劉可訓鎮臣
侯良柱以一旅之師破賊十餘萬衆直如拉朽摧
枯豈專師武臣之力仰賴皇上威德退屯莫不震
疊故兩臣身先士卒背水決戰直以忠義之氣勝
之耳元兇大慙殺戮幾盡倘寬宥脅從之誅西南半
壁已可從而底定矣廟謨弘遠將欲剿洗以盡穢
之拓土開疆此最勝之烈也惟是駭鹿易逐而狡
兔多窟土夷烏合賢繁有徒嘗見貴州解圍之後
賊無堅壘直搗大方當時尙加持重豈至自棄前
功懲前宍後必須先事詳計謀出萬全以畢此不
常有之奇勳所當慎者一也功名之地人所欲居
軍氣方揚易於輕敵而功高取忌則挑釁養寇逗

逼以自圖者又未必無之嘗見三路進兵期會牽制劉撫與見侯癸爭呼幾同聚訟若非賊燧門庭道鎮獨當一面誰為出奇制勝故必協力同心呼吸相應將伯必可助予固人不妨成事前牙後勁殺賊招降總屬廓清勿致見分爾我築舍道旁失此不再得之機會可當慎者二也水外膏腴已無難收入版籍進之深林密箐陵谷險阻攻取為艱城守不易嘗見遵義郡縣其地近者三十年則壞所賦幾何有無補於公家而城郭宮室官僚守衛之費先已不貲安在廣地之不荒而遠畧之足勤也鬼方僻壤力爭諸原律將安用當先有控馭成畫以厝置之勿徒疲腹衷以事荒服而竟委此血戰之功於草莽所當慎者三也西南用兵九年兵戈所駐荆棘生焉諸所經過室廬荒廢萬竈寒煙蕭條滿目今幸大捷正哀鴻集澤之日矣兵貴拙速不尚巧遲速則來機巧則生變况亡首傷股之

餘躡以大軍有何堅陣即當剋期蕩平甦此轉輸
之才遺勿使遺孽復安又生多事倘或高須斟酌
亦當蚤為請命罪在可原者待以下死使知雷霆
自擊天地自寬戰勝之師寧戰而不騁以安反側
前之勁敵功在攻克後之窮寇功又在收服勿但
貪功妄殺零碎報捷致時可削平仍責劍買牘之
無期窮兵黷武自焚可虞千羽兩階豈曰虛語耶
楚蜀滇黔每歲百萬之金錢不至長付之逝波也
慎以相機速以結局安危難易晷刻是爭
審時度勢西南安攘之急著似不出此

倪斯蕙保蜀援黔疏

為蜀局將結黔事再壞勢必借
蜀援黔究且因黔憊蜀情自切

於同室計必盡於萬全敬打一符以佐末議以保西
南半壁事蓋今中外知邊事之為急不知黔事之為
急也知黔事不知黔事即為蜀事也惟借蜀而後可
以援黔惟保黔而後可以安蜀黔一日未得了局蜀

一日未得息肩是黔蜀竟相終始天下安危實繫於此
臣蜀人也生長重慶奮簡之變酷罹其禍三疏叫閤報
變善後請餉詳具列款荷蒙聖恩俞允下部議覆多所
採擇謂宜數月之間即可蕩平不虞淹至四年師益老
財益匱人心益惴惴不安而黔師又報潰矣臣自己酉
得請假養親比今十七年矣辛酉二月蒙恩起補原官
尋值奮簡之變本省按臣題臣蒙難不屈伏荷聖旨憫
臣家難奉部檄催臣上任屬臣父驚悸成病出城四閱
月物故至去冬十月始服闋會黔中又以敗聞臣在梓
里聞見最真恨不插翼飛入春明一為皇上紓此西顧
憂行至河南地方偶感風寒延洪縣醫李尚文調治尚
無起色萬一臣疾未瘳流馬朝露則臣之一念杞憂霍
謀終未得盡吐於皇上也因不避愚賤敢再披瀝蓋自
奮簡煽亂全蜀震動仰仗皇上威靈昏撫按道諸臣相
機戰守設奇制勝亦既解成都復重慶收四十七郡縣
恢復永寧掃蕩蘭州粟粟獻俘闕廷挈玉壘金蹕之舊

還之陛下蜀事虛已了局蜀人從此安枕謂宜乘
膳席捲一掃揔槍乃奮酋尚魚遊於釜底安賊猶
虎峙於牂牁芒部鎮雄諸夷且欲窺漁利於螭蚪
奢借安為負隅安以奢為奇貨組合一團結成三
窟我師進則彼故退以誘我之入我師退則彼故
進以躡我之後我師不進不退故彼兩持觀望以
老我之師彼為其主我為其客彼以逸待勞我以
勞就逸彼合一心以禦我我分兩省以禦彼况岵
洞箐林既難長驅直搗而重趺不毛千里餽餉又
三十鍾不能致一石荷戈者難於枵腹當事者勇
於成功往往輒墮賊計自取餽以朝廷數百萬
金錢全省數百萬民命止供眾兵一走非葬魚腹
則填虎口今賈生在當何如痛哭流涕焉臣竊謂
此一事也變之方起似難而或易及事之既久似
易而實難蓋彼時賊勢方張人心奮勇切不共戴
天之仇有封狼居胥之意恨不賈勇登先滅此朝

食如人之初病六脈俱沈疾勢正劇人子急於求醫術士療治恐後比今病已休因人臥牀責人子之心已竭醫家之術漸窮雖有命跗倉公其將何以措手耶且蜀自秦苻之後大半消耗氣息奄奄旁有臥病呻吟者不忍坐視復欲策扶羸力疾往拯人未謀而我益病此兩難之道也在蜀以援黔而兼討賊在黔以賊水而兼驅商必欲揀黔當先固蜀必欲固蜀當重為黔計昔我太祖高皇帝之征東川勅諭傳友德曰東川芒部水西諸夷聚夥無事則互爭有事則相援昔閩羅鳳上居大理唐兵追捕遁出夷地聚集凶醜偶以不備喪師又曰夷地險峻崎嶇大將一至竄入林藪猝難捕獲宜駐兵屯種待以歲月而後可圖煌煌王言非蜀事之明鑑哉今內帑旣不敢頻請民間又不能再派惟有太祖屯種之法在然事無專責終屬築舍或特屬一道專管屯田而地方遼闊難以逐一履敵

各府原設有軍屯同知應擇任廉能二員畫地而
田計畝而耕土民降夷一體分授庶無事則守有
事則戰久之屯農漸慣習戰則防兵亦可漸撤趙
充國之因先零計不越此則屯田之設不可不講
也又考太祖皇帝征建昌也藍玉奏四川地曠山
險控扼西番蠻夷梗化欲多置軍衛籍民為軍上
曰連年供輸煩擾兵久在外不宜重勞但養銳蓄
威徐議後舉夫以太祖之神武國初之物力傅藍
諸將之驍傑猶斤斤其慎如此兵法百里而趨刊
者蹶上將今日之事豈宜輕試深入再蹈覆轍哉
只宜行間諸苗以攜其黨厚積戎餉以待其固多
方綱繆以固其圍如太祖所謂徐議後舉者是也
况敗師之後神氣便難猝振大兵便難驟集必須
需以日月待以鎮靜發以沈毅而後萬舉萬當一
戰即捷則進兵不可不慎也漢臣諸葛亮初平蜀
南曰若留外人則當留兵兵留則無所食一不易

也蠻初傷破父兄死喪留外人而無兵則必貽患
二不易也蠻屢有廢殺之罪自嫌蒙重若留外人
終不相信三不易也今吾欲使不留兵不運餉而
綱紀粗安有味乎漢臣之言其今日平蜀之第一
義乎業已復永寧收蘭州則此一塊土作何防守
作何安插則區畫不可不周也昔播事之初七姓
交攻有內叛而無外援今水蘭之變各夷糾結有
外援而無內叛計非設間懸賞便難遮得要領督
臣苦心區畫數年於此具有成效賞信罰必惟在
朝廷益申飭之諸上司有能擒安奢二酋以獻者
卽以其土地與之若中懷觀望尚持兩可有罪無
赦則賞罰不可不信也蜀兵所稱慄悍勅卒惟南
岸白桿子耳乃南岸之兵原不滿萬今日招去而
逃明日逃回而招總之此兵往還道路布冒饟餉
甚之游手凶命之徒手不能挽弓身不能操甲虛
冒南岸補充兵數每見管兵之官經過渝城臨時

招募或雇倩應點隨卽散去見賊而逃者皆此輩也則兵之真偽數之虛實不可不覈也孫吳將兵卽婦人宮嬪皆可為戰如依臣曩疏青成有司處處團練鄉兵人可為兵家可為壘比今四年久卽未必能摧鋒陷陣亦可扼要守陴乃一聞報警遂招募兵旣扶驕蹇以邀重餉又恣咆哮以噬道路地方豈乏兵特訓之無人練之無法以故往往卽給於土司耳如叙州瀘合遵桐綦江各官設兵防守誠申飭鄉兵卽以此為有司殿最不惟可以防奢尚之逸亦可以折驕兵之氣而壯地方之膽則鄉兵不可不練也臣尤有請者往卽銓部時其時河工正亟地方官員皆註停推陞至今猶記之昔官重久任謂不宜以迎送頻頻擾累百姓况今殘破之後坐未煖席事無成績又以他徙去接管不一推諉易生何以專責成而奏成功乎謂宜仿昔年治河例一切俱停推陞只待平蠻後按功陞擢

破以常調即開府京堂亦不受焉庶事有責成官
無却担而何難殲此蠻類則久任之責不可不議
也此內外諸臣或言之已悉豈敢再勸陳言輒瀆
天聽惟是傷弓之鳥計切維桑乃鳴不擇音之時
也顧方伏枕旅次日理藥裹若待臣入奏疾可無
期故敢輒為臆列如以臣言不課伏惟聖明俞允
下部採擇施行地方幸甚奉聖旨然師再挫協劉
宜亟但兵弱餉乏委難輕進地方官有能屯種養
銳設閭懸賞團練鄉兵俟事平之後一體起擢以
後但係黔蜀賢能官員任滿都著加銜管事不得
含糊陞遷
該部知道

傳

唐盧藏用陳子昂別傳

陳子昂字伯玉梓州射洪縣人也本居潁川四世祖方慶

得墨翟祕書隱於武東山子孫家焉世為豪族父
元敬瑰偉個僕年二十以豪俠聞屬鄉人阻饑一
朝散萬鍾之粟而不求報於是遠近歸之若龜魚
之赴淵也以明經擢第受文林郎固究覽墳籍居
家園以求其志餌地骨鍊雲膏四十餘年嗣子子
昂奇傑過人姿壯嶽立始以豪子馳使使氣至年
十七八未知書嘗從博徒入鄉學慨然立志因謝
絕門客專精墳典數年之間經史百家固不該覽
尤善屬文雅有相如子雲風骨初為詩幽入王適
見而驚曰此子必為文宗矣年二十一始東入成
京遊太學歷抵羣公都邑靡然屬目矣由是為遠
近所稱藉甚以進士對策高第屬唐高宗大帝崩
於洛陽宮靈駕將西歸子昂乃獻書闕下時皇上
以太后居攝覽其書而壯之召見問狀子昂貌履
寡援然言王霸大畧君臣之際甚慷慨焉上壯其
言而未深知也乃勅曰梓州人陳子昂地籍英靈

大稱偉曄拜麟臺正字時洛中傳寫其書市肆問
巷吟詠相屬乃至轉相貨鬻飛馳遠邇秩滿隨常
牒補右衛曹上數召問政事言多切直書奏輒罷
之以繼母憂解官服闋拜右拾遺子昂既受黃老
言尤耽味易象往往精詣在職默然不樂私有掛
冠之言屬契丹據營州建安郡王攸宜親總戎律
臺閣英妙皆置在軍麾時勅子昂參謀帷幕軍次
漁陽前軍王孝傑等相次陷沒三軍震懼子昂進
諫曰主上應天順人百蠻向化大王以元老懿親
威畧邁世受作廟堂精甲百萬傾天下以事一隅
此猶舉泰山而壓卵建瓴破竹之勢也然而張元
遇王孝傑等不謹師律由此長敵威而殆戰士夫
敵威長則難以爭鋒戰士殆則無以制寇今敗軍
之後天下側耳草野傾聽國威令大王冲謙退讓
法制不申每事同前何以統眾前如兒戲後如兒
戲豈徒為敵所輕亦生天下奸雄之心聖人威制

六合故用聲爾非能家至戶到然後可服況兵貴
先聲今發半天下兵以屬王安危成敗在百日之
內何可輕以為尋常大王若聽愚計即可行若不
聽必無功矣須成功報國豈可送身誤國耶伏乞
審聽請盡至忠之言凡事須先量智愚眾寡勇怯
強弱部技將帥之勢然後可以合戰求利以長攻
短令皆向前不量力又不簡練暗驅烏合敗後怯
兵何由取勝僕一愚夫猶言不可況奸賊勝氣十
倍未可當也且統眾禦奸須有法制親信若單獨
一身則朱亥金鉞有竊發之勢不可不畏人有負
琬琰之寶行於途必被劫賊何者為寶重人愛之
今大王位重又總牛天下兵豈直琬琰而已天下
利器不可失一失則後有聖智之力難為功也故
願大王於此決策非小諫兒戲可了若此不用忠
言則至時機已失機與時一失不可再得願大王
熟察大王誠能聽愚計乞分麾下萬人以為前驅

則王之功可立也建安方求關士以子昂素是書
生謝而不納子昂體弱多疾感激忠義常欲奮身
以答國士自以官在近侍又參預軍謀不可見危
而惜身苟容他日又進諫言甚切至建安謝絕之
乃署以軍曹子昂知不合因相然下列但兼掌書
記而已因登蜀北樓感昔樂生燕昭之事賦詩數
首乃泣然涕而歌曰前不見古人後不見來者念
天地之悠悠獨怆然而涕下時人不知也及軍罷
以父老夫乞罷職歸侍天子優之聽帶官取給而
歸遂於射洪西山構茅宇數十間種樹採藥以為
養憾國史蕪雜乃自漢孝武之後以迄於唐為後
史紀綱紀綱粗立筆削未終鍾文林府君憂其書
中廢子昂性至孝哀號柴毀氣息不逮屬本縣令
段簡貪暴殘忍聞其家有財乃附會文法將欲害
之子昂懼家人納錢二十萬而簡意未已數與
曳就吏子昂素羸疾又哀毀杖不能起外迫苛政

自度氣力恐其不全因命著自筮卦成仰而號曰
天命不祐吾其死矣於是遂絕年四十二子昂有
天下大名而不以矜人剛果強毅而未嘗忤物好
施輕財而不求報性不飲酒至於契情會理兀然
而醉工為文而不好作其立言措意在王霸大畧
而已時人不之知也尤重交友之分意氣一合雖
白刃不可奪也友人趙真固鳳閣舍人陸餘慶殿
中侍御史王無競亳州長史房融右史崔泰之處
士太原郭襲微道人史懷一皆篤歲寒之交與藏
用遊最久飽於其論故其事可得而述也其文章
散落多得之於人口今所存者十卷嘗著江上人
文論將磅礴機化而與造物者遊遭家難亡之荆
州倉曹掾里馬擇曰擇昔從父友王適獲陳君欣
然忘我幼齡矣榆關之役君籌其謀戎安累年不
畏晤語聖歷初君歸寧舊山有掛冠之志予懷役
南遊邁茲微甚幽林清泉醉歌絃詠周覽所計條

徧岷峨予旋未幾陳君將化悲夫言絕道冥杳然若喪之幾
延陵心許而彼已亡天喪斯文我憾何及君故人范陽處藏
用集其遺文為序傳識稱其實錄嗚呼陳君為不亡矣遂為
贊曰岷山導江四薄萬里浩瀚鴻浴東注滄海靈光氤氳上
薄紫雲瑰寶所育則生異人於戲才可兼濟屈而不
仲行通神明困於庸塵子曰道之將喪也命矣夫

宋司馬光范鎮傳

范景仁名鎮益州華陽人也少舉進士善文賦塲屋師之為人和易

修物叅知政事薛簡肅公端明殿學士宋景文公
嘗器重之補國子監生及貢奏院名皆第一故事
殿廷唱第過三人則為奏名之首者必執聲自陳
以祈恩雖考校在下天子必擢寘上列以吳春卿
歐陽永叔之耿介猶不免從衆景仁獨不然左右
與並立者履趣之使自陳景仁不應至七十九人
始唱名及之景仁出拜退就列訖無一言衆皆服
其安恬自是始以自陳為恥舊風遂絕釋褐新安

主簿到官數旬時宋宣獻公留守西京不欲使
與下吏共勞辱召置園子監使教諸生秩滿又
薦於朝為東監直講未幾宋景文公奏同修唐
書及用參知政事王公薦召試學士院詩用彩
霓字學士以沈約郊居賦雖霓連塘讀霓為入
聲謂景仁為失韻由是除館閣校勘殊不知約
賦惟取聲律便美言霓不可請為平聲也當時
有學者皆為景仁憤節而景仁處之晏然不自
辯為校勘四年乃遷檢理丞相龐公薦景仁有
美才不汲汲於進取詔除直秘閣未幾除起居
舍人知諫院仁宗性寬仁言事者競為微訐以
求名或緣愛憎汚人以帷箔不可明言之事景
仁獨引大體自非闕朝廷安危繫生民利病皆
闕畧不言陳恭公為相嬖妾張氏笞殺婢御史
劾奏欲去之不能得乃誣之云私其女景仁上
言朝廷設臺諫官使之除讒慝也審知御史所

言則執中可斬如其不然御史亦可斬御史怒甚劾景仁以為阿附宰相景仁不顧力為辯其不然深救當時之弊識者避之仁宗即位三十年五年未有繼嗣嘉祐初暴得疾旬日不知人中外大小之臣無不寒心而畏避嫌疑相倚伏莫敢發言景仁獨奮曰天下事尚有大于此者乎捨此不言顧惟挾摘細微以塞職是真負國吾不忍也即上言太祖捨捨其子而立太宗周王既薨真宗宗室子養之宮中陛下宜為宗廟社稷計早擇宗室賢者優其禮數試之以政與圖天下之事以繫天下人心章累上寢不報景仁因闖門家居自求誅譴執政或諭以奈何效干名希進之人景仁上執政書言繼嗣不定將有急兵鎮義當死朝廷之刑不可死亂兵之下乃鎮擇死之時尚何暇顧千名希進之嫌而不為去就之決哉又奏稱臣竊觀大臣之意恐行之而

事有變故畏避而為容身之計也萬一兵起大臣家中族首領顧不可保其為身計亦已疎矣就使事有中變而死陛下之職與其死於亂兵不猶愈乎乞陛下以臣此章示大臣使其自擇死所聞者為股栗尋除東侍御史知雜事景仁因解不辦乞解言職就散地執政復諭以上之不豫請大臣亦當建此策今姦言已入為之甚難景仁復上執政書云但當論事之是非不當問其難易況事早則濟緩則不及此聖賢所以貴機會也諸公謂今日難於前日安知他日不難於今日乎謂今日姦言已入不可弭他日可弭乎凡見上面_缺七有七朝廷不能奪乃罷諫職改集賢殿修撰頃之陞知制誥遣翰林學士英宗即位中書奏請追尊濮安懿王事下兩制議以為宜稱皇伯高官大國極其尊榮大忤執政意更下尚書省集百官議之意朝士必有迎

合者既而臺諫爭上言為人後者為之子不得顧私親今陛下既為仁宗後若復追尊漢王是貳統也殆非所以報仁宗之盛德衆論鼎沸執政欲緩其事乃下詔罷百官集議曰當令禮官檢詳典禮以聞景仁判太常寺即具列為人後之禮及漢魏以來論議得失悉奏之與兩制臺諫議合執政怒召景仁詰責之曰詔書曰當令檢詳奈何遽列上耶景仁曰有司得詔書曰當宰稽留即以聞乃其職也奈何更以為罪乎會宰相遷官景仁當草制坐失於考按不合故事加侍讀學士出知陳州今上即位復召遂翰林王介甫參知政事置三司條劄司變更祖宗法令專以聚斂為務斥逐忠直引進姦佞景仁上疏極言其不可朝廷不報景仁時年六十三因上言即不用臣言臣無顏復居位食祿願聽臣致仕章累上語益切直介甫大怒自草制書極口

醜詆以本官戶部侍郎致仕凡所應得恩例悉
不之與於是當時在位者皆自愧景仁名益重
于天下介甫雖詆之深人更以為榮焉景仁既
退居有園第在京師專以讀書賦詩自娛客至
無貴賤皆野服見不復謝故人或為具召之雖
權貴不拒也不召則不往見之或時乘輿出遊
則無遠近皆往嘗乘藍輿歸蜀興舊樂飲賤
施其貧者周覽江上窮其勝賞期年然後返年
益老而視聽聰明支體尤堅強嗚呼鄉使景仁
枉道希世以得富貴豈屈辱任憂患豈有今日
之樂耶則景仁所失甚少所得殊多矣詩云愷
悌君子神所勞矣又曰樂只君子遐不作壽景
仁有焉客有問今世之勇於迂叟者叟曰有范
景仁其為勇人莫之敵客曰景仁長僅五尺猶
猶如不勝衣奚其勇叟曰何哉而所謂勇者而
以瞋目裂眦鬚上指冠力曳九牛氣陵三軍者

為勇士是特匹夫之勇耳勇於外者也若景仁勇於內者也自唐宣宗以來不欲聞人言立嗣萬一有言之者輒切齒疾之與倍畔無異而景仁獨唱言之十餘章不止視身與宗族如鴻毛後人見景仁無恙而繼為之者則有矣然景仁者冒不測之淵無勇者能之乎人之情孰不謂天子與執政親愛之至隆者孰若父子執政欲尊天子之父而景仁引古義以爭之無勇者能之乎祿與位皆人所貪我老且病前無可冀猶戀戀不忍捨去況景仁身已通顯有聲望視公相無跬步之遠以言不行年六十三即拂衣歸終日不復起無勇者能之乎凡人有所不能而人或能之無不服焉如呂獻可之先見范景仁之勇決皆余所不及也余心誠服之故作范景仁傳

蘇轍巢谷傳

巢谷字元修父中世眉山農家也少從士大夫讀書老為里校師幼傳父

學雖朴而博舉進士京師見舉武藝者心好之谷
素多力遂棄其舊學蓄弓箭習騎射久之業成而
不中第聞西邊多驍勇騎射擊刺為四方冠去遊
秦鳳涇原間所至交其秀傑有韓存寶者尤與之
善谷教之兵書二人相與為金石交熙寧中存寶
為河州將有功號熙河名將朝廷稍奇之會瀘州
蠻乞弟擾邊諸郡不能制乃命存寶出兵討之存
寶不習邊事邀谷至軍中問焉及存寶得罪就逮
自料必死謂谷曰我涇原武夫死非所惜願妻子
不免寒餓橐中有銀數百兩非君莫可使遺之者
谷許諾即變姓名懷銀步行往授其子人無知者
存寶死谷逃避江淮間會赦乃出予以鄉閭故幼
而識之知其志節緩急可濟者也予之在朝谷浮
沈里中未嘗一見紹聖初予以罪謫居筠州自筠
徙雷徙循子兄子瞻亦自惠再徙昌化士大夫皆
諱與子兄弟遊平生親友無復相關者谷獨慨然

自眉山誦言欲徒步訪吾兄弟聞者皆笑其狂元符二年春月自梅州遺予書曰我萬里步行見公不有意全今至梅矣不旬日必見死不恨矣予驚喜曰此非今世人古之人也既見握手相泣已而道平生逾月不厭時谷年七十有三矣瘦瘠多病非復昔日元修也將復見子瞻於南海子愍其老且病止之曰君意則善然自此至僭數十里復當渡海非老人事也谷曰我自視未即死也公無止我留之不可聞其橐中無數千錢子方乏困亦強資遺之船行至新會有蠻隸竊其橐裝以逃復於新州谷從之至新遂病死于聞哭之失聲恨其不用吾言然亦奇其不用吾言而行其志也昔趙襄子厄於晉陽知伯率韓魏決水圍之城不沒者三板縣盞而豐易子而食羣臣皆懈惟高恭不失人臣之禮及襄子用張孟談計三家之圍解行賞即臣以恭為先談曰晉陽之難惟恭無功曷為先之

葉子曰晉陽之難羣臣守懈惟恭不失人臣之禮
吾是以先之谷於朋友之義賢無愧高恭者惜其
不過葉子而前遇存寶後遇子兄弟子方離居南
夷與之起居出入蓋將老焉雖知其賢尚可以發
之聞谷有子蒙在涇原軍中故為作傳異日
以授之谷始名穀及見之循州改名谷云

元趙汭黃澤世家

先生諱澤字楚望其先長安人唐
末有官於蜀者知資州內江縣曰

舒藝卒鼻資州次子師明留居後遂為資州人先
生生有異質日誦數十言年十二三即通經義論
策之學內附國朝年十六矣慨然以明經學古篤
志力行自勵好為苦思屢以成疾疾止則復苦思
如故年二十餘始旁通古今史志別集詩文皆不
習而能詩尤超邁清美久之於周程張朱之書有
得作願淵仰高鑽堅論以自勉是時行省鉅公猶
有尊賢敬學者屢以書院山長之祿起先生教授

江之景星洪之東湖考滿即歸閉門授徒以為養
悉取六經百氏傳註疑義千餘條雜析辯難以致
其思不復言仕矣始先生嘗夢見夫子以為適然
既而屢夢見之最後乃夢夫子親授所授六經字
畫如新其家無一畝之殖而決意歸休以六經絕
學為己任益深有所感發也時大德甲辰先生年
四十五矣自是以來十餘年間屢悟聖經隱賸之
義凡數十處而失傳之旨以漸可通乃作思古吟
十章極言聖人德容之盛上達於文王周公以致
其寤寐不忘之意先生卒於至正六年丙戌某月
某日得年八十有七以郡人王儀甫所歸棺斂九
江學者益少先生又深自韜晦不求聞知唯待人
接物則無貴賤長幼一致其誠故死之日遠近聞
者莫不哀之先生於經學以精思自悟為主以自
然的當不可移易為則故其悟也或得諸幽閒寂
寞之餘或得諸顛沛流離之頃或得諸疾病無聊

之日或得諸道途風雨之中及其久也則豁然無不貫通自天地定位人物未生以前等而下之凡遠古之初萬物之原載籍所不能具者皆昭若發蒙如視諸掌然後由伏羲神農五帝三王以及春秋之末其人倫之端禮樂之本皇道帝德神化宜民之妙井田區畫之初封建自然之勢鬼神祭祀之始神物前民之用起教立象之機聲教文治之原制作因革之漸忠賢文異尚之體世變禮失之由以力假仁之習皆若身在其間而目擊其事者於是易春秋傳註之釋詩書未決之疑周禮非聖人書之謬凡歷代聚訟不決數十年苦思而未通者皆冰解霧釋昭然各就條理蓋由專精積久而後得之自以為天開其鬼神啓其祕也其於易以明象為先惟因孔子之言上求文王周公之意為主而其機括則盡在十翼故作十翼舉要以為易起於象因數設卦因卦立象因象起意因意生辭

故孔子曰易者象也居則觀其象而玩其辭易不可廢象明矣由象學失傳漢儒撮拾凡陋不得聖人之意王輔嗣忘象之說興至邢和叔則遂欲忘卦棄畫雖以近代鉅儒繼作理學大明而莫能奪也作忘象辯有一卦之象有一爻之象或近取諸身或遠取諸物或以六爻相推或以陰陽消長而為象者學者猶可求也然有象外之象則非思慮意識所能及矣而況於立例以求之乎李鼎祚緝輯於王氏棄擲之餘朱子發後出而加密丁易東繼之而愈詳聖人立象之妙終不可見作象畧象學既明則因象以得意因意以得辭陰陽消長有一定之機上下貴賤有一定之分善惡吉凶有一定之則位之當者孔子無由獨言其非卦與爻之小者文王周公固不謂之大然後知三聖人之易一而已矣若舍象而求則人自為易不期於異而自異作辯同論嘗曰易有八卦有六十四卦有三

百八十四爻有大象有小象有大傳繫辭有說卦
有序卦有雜卦有河圖洛書著策之數學者當隨
處用工各詣其極至一以貫之而後全易見矣其
於春秋以事實為先以通書法為主其大要在考
覈三傳以來向上之工而其脈絡則盡在左傳作
三傳義例考以為春秋有魯史書法有聖人書法
而近代乃有夏時冠周月之說是史法與聖法俱
失也作元年春王正月辨又以為說春秋有實義
有虛辭不舍史以論事不離傳以求經不純以褒
貶泥聖人酌時宜以取中此實義也貴王賤霸尊
君卑臣皆古今通義然人自為學家自為書而春
秋迄無定論故一切斷以虛辭作筆削本旨又作
諸侯取女立子通考魯隱公不書即位義殷周諸
侯禘祫考周廟太廟單祭合食說作丘甲辨凡如
是者十餘通以明古今禮俗不同見虛辭說經之
無益嘗曰說春秋須先識聖人氣象識得聖人氣

象則一切刻削煩碎之說自然退聽矣其但以為寶錄而已者則春秋乃一直史可修亦未為知聖人也其說易有常變春秋有經有權易雖萬變而必復於常春秋雖用權而不遠於經各以二義貫一經之旨常曰易象與春秋書法廢失之由大畧相似苟通其一則可觸機而悟矣蓋古者占筮之書即卦爻取物類象聽虛其義以斷吉凶皆自然之理乃上古聖神之所為也文王周公作易時取一二立辭以明教自九筮之法亡凡筮人所掌者皆不可復見而象義隱微遂為歷世不通之學矣魯史記事之法實有周公遺制與他國不同觀韓宣子之言可見聖人因魯史修春秋筆則筆削則削游夏不能贊一辭則必有與史法大異者然曰其文則史是經固不出於史也今魯史舊文亦不可復見故子朱子以為不知孰為聖人所筆孰為聖人所削而春秋書法亦為歷世不通之義也先

生所謂廢失之由有相似者蓋如此又懼夫學者
得以創聞不復致思故所著書目雖多皆引而不
發乃作易學濫觴春秋指要經旨舉畧稽古管見
示人以為求端用力之方而易春秋全解則終身
未嘗脫彙示人也其辯釋諸經要旨則有六經補
注詆百家異義則取杜牧之不當言而言之意作
翼經罪言其論周禮以為六官所掌皆循唐虞夏
商已行之事雖有因革損益或加詳密而大體不
能相遠非周公創為之制也古今風俗事體不同
若不深考世變而輒指其一二古遠可疑者以為
非聖人之書此不難辯獨其封國之制與孟子不
合則所當論蓋孟子所言因殷之制周官周家之
制也計武王之興殷諸侯尚千有餘國既無功益
地亦無罪削邑此當仍其舊封百里之下為三等
如孟子之說乃若周公太公有大勲勞及其餘功
臣當封爵與夫並建宗親以為藩屏豈可限以百

里之法哉自當用周制耳諸侯惡其害已而去其籍是書當世學者鮮得見之則周家一代之制雖孟子亦有不能詳也其於官屬多寡之由職掌交互之故錯亂之說發義尤精其祭祀之法則兼戴記而考之作二禮祭祀述畧禮經復古正言其辨王肅混郊丘廢五天帝併崑崙神州為一祭之說曰祭法虞夏殷周皆以禘郊祖宗為四重祭周人禘饗而郊稷祖文王而宗武王禘祭天地以饗配即圓丘方澤是也郊祀上帝以後稷配建寅之月南郊祀感生帝以祈穀也四時祭五天帝於四郊以迎氣也祖帝饗以後稷配尊始祖之所自出也宗祀文王於明堂以配上帝總配五天帝也其後則祖文王於明堂以配五帝宗五王於明堂以配五神凡此皆鄭氏義也故周禮大司樂注以圓丘方澤宗廟為三禘蓋天神地祇并始祖之所自出為三大祭皆五年之禘也郊次圓丘社次方澤宗

次祖皆常歲所舉之祭也東遷土感財匱大禮遂廢所修唯郊社二祭故國丘方澤二禘傳諸記亦罕言之非淺聞所及矣周禮有祀天旅上帝祀地旅四望之文天地主於一故稱祀上帝四望非一神故稱旅肅欲以國丘為郊可乎司服王祀昊天上帝服大裘而冕祀五帝亦如之既曰亦如之則五帝之祀與昊天上帝非一祭矣肅欲混之可乎孝經稱嚴父配天又稱郊祀后稷以配天宗祀文王於明堂以配上帝易豫卦曰先王以作樂崇德殷薦之上帝以配祖考上帝亦天神也肅欲廢五天帝而以五人帝當之可乎崑崙者地之頂神州者地之中皆天地之所交也地亦主崑崙神州非是設此二祭乃求神於二處天地神靈莫測不知神之在彼乎在此乎故求之於彼亦求之於此也康成以方澤主崑崙北郊主神州北郊不見於經誤分為二王氏由此并崑崙神州為一祭而遂謂

北郊為方澤可乎若鄭氏知樂九變之祭為禘而不言及嚳又以為禘小於祫此則其失也故斷之曰鄭氏深而未完王肅明而實淺晉武帝肅外孫也故用其說并方園二丘而祀南郊歷代無所因襲而周禮天神地示人鬼極虛之祭遂為古今不決之疑矣其辨感生帝之說曰姜嫄履帝武敏歆而生后稷周人特為立廟而祭謂之閭宮君子以為聖人之生異於常人無異義也況乎生民之初氣化之始五天之精感而為帝王之祖亦何疑乎五帝感生之祀上世流傳既久非緯書創為之說也且河圖洛書著策之數皆緯文也其可盡廢乎其辯胡仁仲以社為祭地曰二社以享水上穀之神而配以勾龍稷非祭地也禮天子諸侯羣姓百姓大夫及庶民皆立社故有王社侯社大社國社置社之名其名義高下不同如此而謂之大亦之祭可乎殷革夏周革殷皆屋其社是辱之也早乾

水溢則變置社稷是責之也王者父事天母事地
顧可責可辱乎周禮王祭社稷五祀則希冕一社
稷下同五祀而用第五等之服不得與先生先公
四望山川比則社非祭地明矣傳曰戴皇天履后
土是后土卽地也周禮大祝大封先告后土大帥
旅大會同宜於社又建國先告后土則后土非社
矣舜典類于上帝禋于六宗望于山川六宗者上
下四方之神卽五天帝及地也故其祀在上帝之
次山川之前周禮四望與五帝同兆于郊又與祀
地同玉又與山川同祭服則四望者祀地之四方
也又有分樂所祭五土之亦祭地之禮不止於方
澤矣而欲以社當之可乎周禮以圜丘對方澤以
天神對地而以蒼璧禮天對黃琮禮地以祀天旅
上帝對祀地旅四望書及禮記乃多以郊對社蓋
郊社祀上帝社祭水土之神其禮專圜丘方澤徧
祭天神地亦其意廣遠分為四祀明矣天地之道

高深幽遠大神大亦不可煩瀆故歲事祈之於郊而水上之變則責之於社此古人立祀深意也胡氏家學不信周禮故率意立說如此大抵先生之意以為聖人制禮遠近親疎高下貴賤皆有自然之序必通其本原而後禮意可得蓋圜丘所祭者全體圓轉之天總南北極黃赤道日月星辰所麗者而言故主北辰而曰天神皆降是總祀天神也上帝者高高在上之天以其在上而為主宰故曰上帝分主五方故曰五帝合上下四方而言則曰六宗皆天神之分配者也方澤所祭者全體承天之地總山陵川澤極天所覆者而言故土崑崙而曰地亦皆出是總祀地亦也地有四方望其方而祀曰四望五嶽四瀆之祀曰山川澤山陵丘陵墳行原隰之祀曰五上水土之祀曰社皆地亦之分祀者也所謂自然之序益如此其辯趙伯循王者禘其始祖之所自出之帝於始祖之廟以始祖

配之而不及葦廟之主曰大傳王者禘其始祖之所自出以其祖配之諸侯及其太祖大夫士有事省於君干祫及其高祖此以禘與祫對言則禘祫皆合祭通上下文言之也蓋諸侯之祫猶天子之禘諸侯及其太祖大夫士及其高祖是有廟無廟之主皆在而又上及其太祖高祖故謂之祫天子則於七廟及祧廟之上更及所自出之帝故謂之禘也若曰禘其祖之所自出而反不及有廟無廟之主寂寥簡短非人情矣故程子曰天子曰禘諸侯曰祫其禮皆合祭也爾雅禘大祭也非大合昭穆何以謂之大祭乎字書訓釋曰禘者諦也審諦昭穆也若非合祭何以有昭穆乎蓋后稷有廟郊既配帝嚳雖配天而無廟不可闕人鬼之享故五年一禘則后稷率有廟無廟之主以共享於學所以使子孫皆得見其祖又以世次久遠見始祖之功德為尤盛也况后稷之廟毀廟數十世之主皆

藏焉豈可當享饗之時而屏置之乎蓋禘祫所以相亂者由天子諸侯之制不明先儒或推天子之禮以說諸侯或推諸侯之禮以說天子不知諸侯之禮有祫無禘天子之禘禮必兼祫雖其意不主合食而率子孫以共尊一帝自然當合食矣禮曰天子植初祫禘祫嘗祫烝則是天子祫祭隨時皆用也其辨成王賜魯天子禮樂曰周公相成王制禮作樂為天子諸侯不易之大法身沒而王與伯禽躬為非禮而享周公成王賢王魯公賢君必不至是以魯頌白牡駢剛推之則記禮者之過也禘者殷諸侯之盛祭周公定為不上不禘之法故以禘代之成王以周公有大勲勞於王室故命魯以殷諸侯之盛禮祀周公以示不臣周公之意故牲用白牡白牡者殷牲也駢剛者魯公之牲也又可見魯公以下皆合食於太廟而禮秩初未嘗取同於周公又以春秋推之則亦非常歲之祀成王斟

酌禮意蓋如此而非有祭文王為所自出之禮如
或者之云也其神於羣公之廟則後世始借之然
晉亦有神蓋文公有勲勞於王室欲效魯禘祭而
請於天子故得用之也若夫東周諸侯為所自出
之王立廟稱周廟如魯與鄭是也然止謂之周廟
不敢以祖廟稱之諸侯不敢祖天子也然則子孫
亦不敢享於廟單祭所自出而已祭用生者之祿
剛亦用諸侯之禮而已若魯既得禘於周公之廟
則周廟亦應用神祇必有配則固宜於文王廟以
周公配也若據趙氏則魯本無文王廟止於周公
廟祭文王臨期立文王主與尸而祭之此於禮意
實不相似若以為有文王廟則是於文王廟迎尸
以入周公廟以父就子以尊就卑必不然也魯之
郊大雩則平王之世惠公請之是矣然郊祀蒼帝
行三望雖借而猶未敢盡同於王室也蓋以魯有
天子禮樂為成王賜者本明堂位祭統以為惠公

所請者出呂氏春秋魯鄭周廟皆有禘祀見左傳先生以經證經而折衷百氏之說多如此其辯說詩之失以為古者重聲教故采詩以觀所被之淺深然今三百篇有出於大師所采者周南召南是也有錄於史官而非大師所采者豳風及周大夫所作是也其餘諸國風多是東遷以後之作率皆諸國史官所自記錄方周之盛美刺不興漢廣江沅諸詩雖足見諸侯之美而風化之原實繫於周其後天子不能統一諸侯善惡皆無與於周故不論美刺皆謂之變風以其不繫於二南而各自為風也周禮王巡守則太史太師同車又其官屬所掌皆有世繫之說方采詩之時太師掌其事而太史錄其時世及巡守禮廢太師不復采詩而後諸國之詩皆其國史所自記錄以考見風俗盛衰政治得失若左傳於高克之事則曰鄭人為之賦清人莊姜之事則曰衛人為之賦碩人必有所據矣

故大序曰國史明乎得失之迹傷人倫之廢哀刑
政之苛吟詠性情以調其上達於事變而懷其舊
俗是說詩者不可不辯其乘詩之時是也秦雖降
為國風此時王澤猶未竭也故人民忠愛其君猶
能若此其後聽者既玩而言者亦厭遂與之相忘
則雖國風亦不可復見至此則書契以來文治之
迹始剝絕矣以時考之國風至於澤陂在頃王之
世當魯文公之時故曰王者之迹熄而詩亡故說
詩者尚論其世也先生經學自得之說為多以其
書不大傳故撮其關於禮要者著之當是時唯臨
川吳文正公辯學正誼盡通諸經最為知先生者
當拜集賢之命至揚而還養病九江濂溪書院見
先生所著易學濫觴春秋指要心大善之題其卷
端曰楚望父之著經也其志可謂善矣易欲明象
春秋欲明書法蓋將前無古而後無今又得六經
辨釋補註觀之謂學者曰今人無能知黃楚望者

孟子曰能言距楊墨者聖人之徒也楚望其人乎亦為序以歸之其畧曰楚望貧而力學讀易春秋周官禮記為之辯釋補註弘綱要義昭揭其大而不遺其小究竟謹審均有真見先儒舊說可信者奉拳尊信不敢輕肆臆說以相是非用功深用意厚以予所見明經之士未有能及之者也晚年見此寧不為之大快乎予歎美之不足因以論於學者蓋必於諸經沈潛反覆然後有以見其用功之不易用意之不苟云然先生雅自慎重其學未嘗輕與人言以為其人學不足以明聖人之心志不以六經明晦為己任則雖與之言終日無益也學士季公慨之使還過九江請先生於濂溪書院會寓公縉紳之士躬定師弟子禮假館廬山受一經之學又將經紀先生家為子孫計先生謝曰以君之才輟期歲之功何經不可明然亦不過筆授其義而已若予則於艱苦之餘乃能有見吾非邪子

不敢以二十年林下期若也李學士為之歎息而
去或謂先生幸經道已明於已而又闕於人如此
豈無不傳之懼乎先生曰聖經興廢上關天運子
以為區區人力所致乎德化縣令王君子翼請刊
補註藏先生家先生猶慎重之非其人不傳也洎
經寇亂故宅為墟遺書之存者鮮矣悲夫先生寧
使其學不傳於後終不肯自枉以投諸人是故能
以數十年之勤盡究諸經於闕塞之餘而不能使
聖人之心大明於天下後世蓋其道若是也豈非
天乎昔者吾夫子贊易刪詩定書正禮樂修春秋
將以為百王大典遭秦焚書滅學帝王經世之法
遂斬然泯絕於斯時益自開闢以來宇宙橫分一
大變也鄭康成當專門固陋之世以一家之學纂
釋羣經具著成就孔穎達考覈百家大明鄭義雖
於聖人之道無聞而博古窮經期以勤矣自是四
百餘年習為定論至宋清江劉原父始以聰明博

治之清據經考禮欲盡排周秦以來傳註之失宋
代經學之盛劉公實張之而說者曰新矣及子朱
子出而羣言有所折衷遂定於一猶吾夫子之志
也而黃子於易簡其辭微其義傳使學者皆得自
致於經晚歲猶拳拳禮學而弗克論著其成書貴
闕疑而又深疑古今文之異體春秋獨得書法廢
失之由折衷諸傳各極其當矣而門人學者於二
經師說不能有所發明故君子論古今經註以為
自朱子詩集傳之外俱不無遺憾也先生乃欲以
近代理明義精之學用漢儒博物考古之功加以
精思沒身而止此蓋吳公所謂前無古而後無今
者也嗚呼其遂不傳也與汙始拜先生於其門請
問治經之要先生念其遠來不以為不可教告之
曰在致思而已然不盡悟傳註之失則亦不知所
以為思也請問致思之道先生曰當以一事為例
禮女有五不娶其一為喪父長子註曰無所授命

近代說者曰蓋喪父而無兄者也女之喪父無兄者多矣何罪而見絕於人如此其非先王之意明矣姑以此思之或二三年或七八年倘得其說則知先儒說經其已通者未必皆當其未通者未嘗不可致思也妨退而思之女之喪父無兄者誠不當與逆亂刑疾之子同棄於世久之乃得其說曰此蓋宋桓夫人許穆夫人之類爾故曰無所受命註猶未失也若喪父無兄則期功之親皆得為主之矣嘗以質於先生先生曰子能如是求之甚善然六經疑義若此者衆矣當務完養而慎思之毋輕廢也遂投以求春秋之要曰楚殺其大夫得臣此書法也當求之於二百四十二年之內夫人姜氏如齊師此書法也當求之於二百四十二年之外汭思之經歲不得其說先生為易置其語曰夫人姜氏如齊師此書法也當求之於二百四十二年之內楚殺其大夫得臣此書法也當求之於二百四十二年之內

百四十二年之外，汙蓋自是始。達春秋筆削之權，乃知先生於六經之學，以其所自得而教人者，蓋如此。惟易所謂象外之象，則有不可得而盡聞者。嗚呼！悲夫！有遺憾矣。謹述先生世家文行大概，與其經學復古之功，如右。伏惟立言君子，以當世斯文為己任者，尚克表章之。至正十有二年，十有一月朔，學生新安趙汙狀。

史母程氏傳

嗚呼！余嘗得三卯錄，讀之，蜀禍之慘，誠不忍言也。夫史，襁孫之死而復生。

也。蜀民就死，率五十人為一聚，以刀悉刺之。過積其尸，至莫疑不死，復刺之。襁孫尸積於下，莫刺者偶不及尸，血淋漓，入襁孫口。夜半始蘇，匍匐入林，薄匿他所，後出為蜀。樞密使嘗祖示人，未嘗不泣。下，賀靖權成都，錄城中骸骨一百四十萬。城外者不計。嗚呼！推是考之，盡可悲者。蜀眉州史氏由唐。

吏部侍郎儼從僖宗幸蜀因家焉其先墓在青神
將二十世宋世號名族其出蜀也今唯居湖州一
房詩其遺事益悲之史母程夫人蘇文忠公之母
之族也夫人將攜其家於峽江以橐金腰纏之兵
暴至伏林莽與鄰嫗謀曰輸金果可生吾兒無資
不復能出蜀史宗誠無漁類矣縱得生旦夕兵復
至亦決死均死死以全史兒誠不恨嫗見身死為
吾出腰中金告兒使速走須史兵果執母謝以寶
亡金遂遇害異日嫗語於鄰告史氏兒甫十三
從草野得尸如其言寔以歸且亟圖其象識曰史
光母年五十有四嘉熙二年十月二十七日申時
死兵難兇遂東南來占籍湖州刻意自奮以右科
為制東兵馬鈴轄鈴轄生子主文任嘉定儒學教
授在嘉定生子台孫介孫喜孫台孫儒術通史文
復有子幾人而史氏孫嘉熙至於今且四傳矣噫
蜀繇秦帝八中夏至於宋凡一千五百餘年文物

大盛絕不知有兵羊一旦掃削殆盡迄今百餘年
遠墟敗棘郡縣降廢幾半可哀也已可哀也已
贊曰婦人內德不出門房中歌廢戰國而下俱不
幸以著非得已也諱莫甚於死從容反覆烈士猶
難之況士女乎歐陽公傳斷臂婦人以愧馮道夫
人以死傳宗承平世澤於是乎見作史者烏得廢
諸

明劉惟德韓娥傳

娥姓韓元四川鹽運司副使韓新
澤之孫處士韓成之女也母王氏

生娥於元至正乙酉城南三歲失怙七歲失恃鞠
於叔父韓立遭元季之亂歲丙申盜賊蜂起劫奪
貨財擄掠婦女無所憚叔母杜氏度娥不能自保
密謂娥曰我夫婦老矣汝年十二必遭厄手吾不
忍視汝受掠吾製男子衣裳汝可服之兒知汝男
或可免叔父又哭曰汝未故官之孫吾鞠汝恤汝

願汝有家不幸至此時也命也汝宜有裁娥受叔
母教即易其服總其角旦日往拜叔母曰而今而
後或違母訓有死無二豈忍不念吾叔母言甘受
寇辱求苟活耶未幾果為寇擔問娥姓名娥曰我
韓開保也遂與負戈而往後遇萬戶王起巖見而
憐之以與千戶羅甲甲蜀之叙南人也撫之如已
子與征雲南自雲南復歸叙南娥在師旅中與人
和睦或有與之嬉戲即正色曰韓開保不能開戲
恐官長怪責無益也每遇初寒未嘗怨咨暑雨未
嘗裸浴至夜則和衣而臥臥常後起常先人問其
故曰恐家務不辦乃爾自是甲有軍旅之事事無
大小娥皆勉勉為之無斯須惰容甲矜其勤慎間
與之酒辭曰開保天性不能飲飲輒病甲益重之
娥尤兢兢業業惟恐有失而違叔母訓出入軍中
一十二年人皆不能窺測又善以父事甲故甲信
而不疑甲嘗謂人曰我之開保幹蠱之子也為之

婚娶莫其成立娥不得已從而百計避之婦訴其
父母父母責娥夫婦不睦娥猶隱諱不言一日娥
從王萬戶自叙南之成都計事娥微行至城東度
綠橋物色得叔父母已不能識矣娥具以實告指
其上額刀傷痕仰天痛哭叔父亦哀其艱苦將以
白金贖之王萬戶謂娥叔父曰是子羅甲之子焉
得為爾之女姪事聞有司召媪視之媪曰室女也
萬戶乃受白金還之叔父以娥歸戍上馬復宗生
男一人女二人娥夫婦繼歿而男女俱存洪武奄
有全蜀王萬戶入京朝授禮部郎中致仕還蜀以
聞於蜀邸王召見賜寶鈔五錠褒之士君子多為
詩文褒美永樂七年冬十二月余使蜀方外士韓
太和立之子娥之弟也以其詳詩余誦之余喜娥
之貞烈且孝作韓娥傳劉生曰韓娥少孤遭時多
艱受叔母一言徵服處軍中一婦人莫辨其為女
孽之執玉馳馬馬蹶而玉不北捧盈升車車搖而

盈不溢善於執捧故也亦由洞洞屬屬之心堅似金石故能保其身歸於馬氏城有三善焉智也貞也孝也詩云既明且哲以保其身城之謂也

楊學可傳

先生姓楊名學可其先世居蜀之新都邑相傳為關西夫子楊震之後至處士

某其裔也有隱德弗仕惟讀書教子鄉閭稱為善士先生其子也自牛角好論孟書既長就學從鄉先生某父詩書春秋三經學既通丁元季世海內震動四郊多壘先生知蜀不能居乃適入雲南之昆明邑昆明士君子聞先生來爭設臯比席以延之先生講論六經開陳二帝三王治天下之大經大法且謂帝王自有真不可僭竊以取荼毒由是名公貴人聞先生之言皆守其分服先生之訓咸知其義故多敬事先生而心竒忌之先生亦知西南夷不可齊以禮又不可屈已以從彼俗尋歸西

蜀適遇明氏強盛以國子助教逼之先生辭不就
職至以法挾之先生堅以抱疾杜門自守逮乎聖
朝混一海宇先生與故官宿儒計偕赴京師訖老
疾辭歸蜀蜀之士知先生道學之明執經座下者
無虛日先生隨其才而教之皆有造就由是先生
之師道益彰彰於遠近矣未幾蜀郡就封崇儒重
道乃召先生為國中士子於式士子多躋顯官盡
忠相國王知先生有德賜田宅於國之大安門外
駟馬橋北俾先生有終身之樂特書流水畫橋題
柱容清風精舍讀書人一十四字列於先生之門
士子從學者皆稱為清風先生云吳郡顧諱篆書
清風精舍扁於室且為文以記大夫士歌詩褒美
永樂七年冬十一月余奉使來蜀道經其門得拜
先生函丈前入門則喜松竹滿園葑菲繞蹊有隱
者之趣焉升堂則喜詩書盈案琴瑟在前有長者
之風焉又愛溫如崑山片玉者仲子也秀若桂林

一技者季子也茂似芝蘭玉樹者衆孫也貴如瑚
璣珪璧者諸生也先生坐定畧見辭色疊疊乎經
史雍雍乎禮讓余益喜而敬曰先生少時奔迸遐
方先難也命也暮年遭遇賢王錫養老厚恩後獲
也命也於是乎先生之清風遠矣高節遂矣宜夫
門弟子以清風先生稱之不誣矣作清風先生傳
劉生曰晉徵士陶潛居柴桑里於夏月高臥北牕
清風颯至自謂羲皇上人先生居精舍子孫娛老
即生論道清風徐來焚香靜坐
陶然為堯舜之民視潛無愧矣

平蜀傳

姓名舊志未載江邑世隸渝郡元末兵
亂羣雄角逐至正十二年全蜀為偽夏主

明玉珍所據渝即夏都江邑為偽盤甸邑未幾珍
殂子昇嗣歲辛亥寶明太祖高皇帝金陵登極之
四年也時已削平羣雄混一疆宇惟明氏依違不
決正月丁丑太祖乃命中山侯湯和為征西將軍

江夏侯周德興為左副將軍德慶侯廖永忠為右副將軍暨平章楊瑄等率荆湘舟師由瞿塘趨重慶潁川侯兵趨隆州五月丙辰湯和師發夔州攻瞿塘以江水暴漲注大溪口己未傅友德兵至漢江阻水未渡造舟以濟己卯至漢州欲以軍中消息達湯和而山川懸隔卒莫能通過水漲乃以木牌數十書克階文歲月投漢江順流而下守者見之為之解體六月壬午友德攻漢州守將向大亨悉兵出戰敗走進克漢川先是夏人聞王師將至悉眾守三峡及階文失守乃分瞿塘守兵以援漢州及至而城已下矣逆戰敗走兩川大震丙戌太祖以湯和師久逗遛詔責之廖永忠聞命奮起率兵先進會得木牌於江和亦進兵自白鹽山伐木開道以趨夔州守將飛天張整眾逆戰大敗退走而出峽水急又阻於鐵索飛橋舟莫可進永忠乃密遣壯士數百人舁小舟踰山渡關以出其上流

夏人不知覺也度其將至乃夜率精銳分水陸為二軍而攻之遂克其陸寨昇舟者出上下夾擊大破之擒斬無算遂入夔明日湯和兵至乃各分兵約會重慶內申永忠舟師自夔州乘勝直抵重慶是日次銅鑼峽明昇等大懼欲奔成都其母彭氏泣止之曰事勢如此往亦無益況此城之兵膽破心悸區區城守死傷必多不如早降以免鋒鏑也乃遣使納款請降永忠以湯和師未至辭不受癸卯湯和兵至乃各駐朝天門昇面縛街壁與母彭氏及諸臣以降東川底定江邑遂入王朝仍隸重慶七月庚申傅友德兵圍成都偽丞相戴壽及知院向大亨等駢象載士出戰友德中流矢益奮銳進擊大敗其兵會得重慶報壽等遂請降友德按兵入自東門士戍遣兵徇下州郡未附者八月甲子周德興兵下保寧蜀地悉定乙丑明昇至京師賜爵歸義侯賞賚甚厚九月乙未和等班師還京

上所佩印綬並所得蜀金印冠冕儀使及路府州
縣宣慰宣撫之數官吏將士牛馬等類太祖頒賞
有差蓋自出師至此凡九閱月爾臣彝曰大哉聖
靈其丕顯乎占者明王伐不敬取其鯨鯢而封之
以為大戮王師伐蜀拯民水火昭義舉哉古者征
西將多不利光武屢闕元戎宋祖兩川反覆現今
中山潁川之師風行電逐無一矢隻輪之助誠帝
王之師以全取勝哉征伐之烈振古所無也薄海
內外罔不康又迄今用休是皆高祖開天列聖撫
運之所被也於戲窺隙隙者仰高明欽勺流考思
滄海劫

我蜀人

嚴傑王源傳

死節者姓王名源字淵之山西太原
五臺人登弘治己未進士授刑部主

事員林正德庚午秋擢四川按察司僉事孟冬入
蜀境賊藍驛作亂都御史林公見素檄公於途公

倉卒置家於保寧間道兼程抵通巴會衆議龔公勉仁分領上漢官軍征剽川北復見林公於軍門親受方畧翌月七日按部營山九日按蓬州十日謀報賊聲言攻營十一日公選鄉勇四百統以義民費弘道等復守營至則十二夜三鼓矣召典史鄧俊醫官馬仁及師生於庭諭以國恩當報忠義難得嗚咽泣下已而復曰我一方重臣今日為汝生靈來分當與城存亡汝等有父母妻子乃獨棄而逃避哉亟令各易服持器械設敵棚以死守又括城中居民十餘人為兵下令曰敢有避縮者以軍法從事衆皆並力一心十三日儀隴告急十四夜漏下四鼓賊數十騎馳至東關公督典史率銳卒乘城對敵賊前鋒不利奔告其酋乃悉衆火其東門而入勢莫能支賊乃大肆十五日公猶持短兵督戰手刃二賊已而麾下盡潰吏負印走蓬州公獨戰於魯公祠下為賊所執身中一刀六鎗將

絕復旦日晡民劉萬秀者亦被傷抱痛至公所公語之曰守城義也城陷身殞吾得死所矣向秀索水秀飲之復索紙筆題詩數首比暮秀以氈冒公十六日賊過祠見公微動復創之乃絕亭午生員羅綱視公惟存血污小衣語民張善解衣衣之相率昇於學門且守護十七日州判孟仁遣吏詳探其甯奔計拊棺痛哭見者流涕次年正月扶柩歸葬五臺營士汝得公詩者遭變故失其全章僅存一絕與其長短吟數句一守忠義所發至今赫赫在人耳目與正氣歌零丁句衣帶臂並傳臧減事聞上憫其忠贈本司副使廕其一子仍勅蓬州營山建祠春秋致祭吁公之死重於泰山

山公之名昭於日月公復何憾哉

羅廷唯胡子昭傳

胡子昭字仲常一字伯尚雋名志高蜀大足人其宅里則在永

川茨山里中余得考焉子昭當洪武中以經明行
修薦至京師高廟重之初仕榮縣訓導時天台方
公孝儒教授漢中倡明道學子昭往從之遊歸而
盡得其所學繼遷翰林檢討充庚辰年史官累陞
至兵部尚書文廟渡江靖難子昭與孝儒先期相
為誓約及被執皆不屈死之臨刑時神色不變賦
詩曰金聲催急鼓聲忙監斬官追上法場烙鐵火
燒紅饒饒剛刀磨利白茫茫此身刑憲歸冥府九族
伶仃各異鄉寄語滿朝朱紫客鐵人無淚也心傷
復易中聯云兩間正氣歸泉壤一點丹心在帝鄉
遂從容就殺都人無不傳誦而雪涕者父復被充
邊軍其妻王氏女住兒俱沒為奴男長曰繼次日
縲俱坐死其弟子儀先是應聘分歲遠教累官山
東僉事聞兄死節棄官匿於丹徒民家蜀獻王知
而憐之命祝髮隱於僧辭曰父母遺體不敢自傷
竟不從二子各數歲撫而謂之曰嗟乎吾兄無後

果天不絕吾氏二子當免於難遂棄去不知所終
有懷鄉詩云一區茅宇棠山下半畝方塘夕照中
鄉國未遂身自遠乾坤雖大足難容蜀人至今皆
能道余嘗過大足棠山見子昭宅遺址旁有胡氏
民家相傳為子儀後或
曰其族也疑不能明

劉霖傳

劉霖永川人也自少負豪俊才隱居不求仕
進嘗客遊瀘州與賢士先坤朋者友善宋季

元兵攻蜀德祐元年六月督萬壽以嘉定降已而
長寧開達及巴渠諸郡望風響應瀘州安撫使梅
應春殺其判官李丁孫推官唐瑞奎以其城降先
是合州守張珏知霖及坤朋名乃深相結納以為
內應至是霖不欲辱身率鄉人起義兵自保乃亟
走詣珏獻長計乞兵恢復瀘州初珏疑其反覆未
之許也霖慟哭幾絕願以身為質珏知其無他始
決策遣所部趙安王世昌等附霖引步卒兼程潛

行至鐵爐城下夜四鼓遣敢死士數十人梯城而入殺守者破神臂門鼓噪而縱火餘兵乘勢悉入霖當先鋒督兵巷戰獲應春數其罪而殺之盡復瀘地時二年之六月也珙大喜亟表薦霖於朝以叅謀幕府累功陞知南平軍事於是州東南依以為安堵矣居無何元兵轉圍瀘州霖復以計援之十一月瀘城粟盡人相食遂敗霖復歸於珙所元至元十五年元兵取重慶路珙軍潰敗霖亦被執不屈同珙死難於舟中過信國文公繫燕獄為瀘州詩以悲之云東南失大將帶甲滿天地高人憂禍胎感歎亦獻敬霖誠高人之儔哉贊曰余聞燕人伐齊圍晝台王蠋蠋死之齊士大夫曰蠋布衣也義不北面於燕况在位食祿者乎於是舉卒復齊國劉南平以布衣義不辱於蒙古心跡相似而功倍之惜乎士大夫不肯南平爾天不祚蜀於人何說哉

丘濬余子俊傳

公姓余氏諱子俊字士英眉之青神人也其先鄆之京山人元末入

蜀父祥仕為戶部郎中公生十歲而孤自幼有大志迥異常兒見者偉其不凡稍長從吳康憲中受詩經中景泰辛未進士第授戶部江西司主事陞福建司員外郎在部屬中獨明敏精勵嘗有兩世家爭田久未決部檄公理之其地名偶與所爭者姓同執為其家改產公曰然則張家灣盡張產耶卒為直之一時能名聞諸上下部有難理事輒以委公天順庚辰出知西安府府居會城下公務叢委訟牒紛紜三邊之事成卒於茲而使車過往無虛日公處之裕如也在任六年治行為關中七府之冠賜璽書旌異歲丙戌擢陝西右叅政督三邊軍餉明年陞右布政使時用兵所需取給有司公在軍中督屬趨辦罔有廢缺是役公經畫之助為多庚寅轉浙江左布政關中軍民皇皇失所倚賴

緣六閏月會西夏有警廷議以為公居陝久中外
信服莫如用公遂拜公右副都御史巡撫延綏公
具疏言狀云陝西有三邊延慶寧夏甘肅也三邊
之患延慶一處於內地為尤近廷議者始請於沿
邊地立界石東西餘二千里於界石外開創榆林
一帶營堡後累增至三十四所延慶二千里屯軍
積糧又於營堡三十里外築墩臺以瞭望有事即
舉烟以示警用是邊境久寧天順以來惟延慶一
帶地無險阻可以屹突虜來侵邊掠我邊人以為
嚮道遂知河套所在久屯其中以伺機變自是虜
顧居內而我列屯守固反在其外一入其中不得
其出遂至遣將聚兵以為之備計以近日用兵所
費芻糧銀鈔以萬萬計今猶屯宿重兵未見寧息
將來供給又難計竊臣愚以為莫若於沿邊一帶
墩臺空處築為邊牆增立峒堡雖非天險要為有
據况舊界石一帶多高山陡崖間有川口亦有限

數乞勅沿邊將領各統銳卒及行陝西布政司起
情民夫付臣統領依山形隨地勢或鏟削或壘築
挑塹延引相接以為邊牆仍勅副叅遊擊等官領
兵於界石之外下營架殿以為防蔽乃東起清水
營之紫城砦西至寧夏之花馬池延蔓幾二千餘
里每二三里間為對角敵臺崖砦連比不絕於其
空處築堵者三橫一斜二如新月狀以偵敵避射
凡為堡十有二崖砦八百十有九小墩七十有八
大墩十有五兩月之間厥功告成自是邊患稀矣
初榆林列戍始於正統歲調延安綏德慶陽三衛
營軍分戍而以河南陝右客兵班上助之未有衛
也成化初議者嘗請榆林城立衛然未就緒至是
公始請以先年陝右清出遠年不明軍籍及有罪
遣戍南土者之子孫免其遠戍就近編伍以實之
且又拓其城比舊加廣凡軍中器用百爾具備率
範銅鐵為之款識以歲月又擇軍民子弟之俊秀

者為弟子員奏請進學立師以教之榆林俗不藝圃公求種於遠教民種植自是蔬果與內地等又於界石外開地以為屯田給軍民耕種得糧十數萬石以助經費自是榆林為重鎮而與寧夏甘肅鼎立為三矣癸巳公以功轉左副都御史又明年進右都御史仍鎮延綏公在延綏首尾六年說者謂榆林之鎮國初未有也有之始於正統然皆草創未備自是以後鎮守巡撫者非一人至公而後守禦之具始大備云丙申以本官移鎮關中有詔命議弭盜安民之策選將勵兵之方公乃條上事宜凡七一曰衛國之計二曰保民之計三曰弭盜之計四曰安民之計五曰選將之計六曰守隘之計七曰善後之計其所建置皆關中軍民切要急務前人未舉者疏入皆從之行之至今人以為便是秋入朝議事屢免此河洪三衛之民戍南方者一萬有奇易置南北之更戍者六千有奇就以分

成固原之葫蘆峽并魏王城設二千戶所領之既
歸鎮岷州四族生羌作亂移兵平之岷地險隘自
國初指揮馬彥深入其地至是再見於公羌人遠
遁相戒曰馬帥復來矣誓不敢反捷聞賜勅獎勵
初公在西安時患城中水多苦饑民以為病宋時
東引龍首渠水入城以利民汲其後湮塞成化二
年又西引漓河之水自丈八頭起修石碣以啓開
搏節放水二分至西門十有五里貫城中以足民
用餘水洩出城積滯日多幾與城基等將至壞城
公有意欲修之未果至是乃議亦如丈八頭開新
渠以洩餘水經漢時故城以達於渭以免公私之
患人至今便之號為余公渠又涇陽縣舊有洪口
堰山高水下不利灌溉乃出公帑責使吏鑿山開
道溉田千頃至今水為秦民之利過者思焉丁酉
召拜兵部尚書論前功加一品俸逾年加太子少
保賜金瑪瑙帶麒麟衣一襲是時權倖氣焰薰灼

公敢與之抗人皆為公危既而相繼敗去公卒無
患時貴州守將恃有粵援亦言播州苗賊齎果等
出肆劫掠恐滋後患乞調湖廣四川軍馬五萬會
貴州討之公言賊在四川而貴州守臣請討必有
主之者興師五萬以三月計之計用軍儲六萬七
千五百斛半年則十有三萬五千而楚蜀山路險
阻不通舟楫取給負戴必得兩倍之數候運至天
氣熱而疾癘作非計也上是之乃止辛丑丁內艱
服除即驛召改戶部尚書癸丑秋命公節制沿邊
諸軍事公請兵數萬分戍尋召還加太子太保乙
巳以星變上言大要欲朝廷節財用而無浪費於
土木禱祈重鹽法而無以竇數作羨餘以賜權貴
禁奪民利而不許貴倖乞開田罷中官俾歸慈役
宮中而無預外事凡此皆人所難言者時論快之
三月上以大同宣府雖有鎮守巡撫等官不足倚
仗兵荒之後疲敝已極必得重臣庶其有濟復勅

公仍總督兩處軍務自總兵以下咸聽節制既而
守將不遵約束公復奏劾之而忌者因造為飛語
俄改左都御史專鎮大同忌者騰撫公行事命工
部杜侍郎及科道官往按之索卷明白無有所私
乃止落太子太保以左都御史致仕家居未逾年
復起公典兵政比至屢疏以病乞休致不許惡復
舊所兼官未盡兩月憲宗皇帝賓天令上副位憲
以疾求去不允疾已亟猶命卧理部事屬楚蜀大
荒公慮有變猶力疾草疏乞遣將臣鎮壓之以銷
未然之患既封進屢問左右章出未或曰否遂側
身而內而卒時己酉歲二月二十一日也享年六
十有一上震悼輟朝一日遣官祭贈特進光祿
大夫太保賜諡肅敏公沈重簡默外若和緩內實
嚴毅自為部屬時事不苟有一事不當輒熟思
審處之夜以繼日或對容猶沈吟未已或問之曰
官中一二事恐不當耳凡奏疏文移必自起草每

夜至二鼓方寢雖疾病中不廢天下事罔不經心而於國計邊務尤所注意一生仕宦立朝之外皆在邊鎮而於關中尤久故於榆林事為詳論問古稱儒臣之守邊者首稱韓范然二公之事載諸史傳者議論居多鑿鑿乎見諸行事而有實跡焉於後世者亦不多見也今余公之建功在延綏環慶之間蓋二公故壤也而榆林邊牆之修延袤餘二千里西人望望而去邊民優游以嬉者餘二十年矣使繼公者人人皆體公心踵而葺之使無至廢壞則公之功留於後世者豈下二公哉夫山川不足而以為補之因阨塞之關順形勢之便似不為過是故秦人築城非非而不量力不恤民則非也烏可以墮而廢食哉北魏高閭亦嘗建此議矣而不克遂而公則遂矣且有效矣而或者不廢其前功而顧逆料其後弊何哉思之也亦非專為公也方公建議時有云凡事務須足到目過似能經

久者方始為之予固知公非苟焉而漫為之者
嗚呼快一已之私而忘國計之大斯人何人哉

崔銑鄒智傳

君諱智字汝愚別號立齋一號秋圃
子蜀合州人也幼有異質日誦萬言

既長受書於舅氏馮進士衡居龍泉庵貧無繼畧
之給乃集樹葉燃以讀書通宵不寐如是者三年

成化丙午領四川鄉試第一郡人聚觀於會江門
外君馬上口占有天下許多難了事鄉人何用太

相驚之句計僭上春官道出三原時大司馬王公
怒致政家居君往見之且曰治天下之道在退君

子退小人而已方今小人在位羣邪肆毒智此行
非但為會試正欲上疏聖天子使進君子退小人

則天下其庶幾乎公笑而不答越明年丁未登進
士第入翰林為庶吉士弘治戊申有星變之異君

上疏極論陰陽之理欲退萬安劉吉尹直而用王
誅王恕彭韶且以君子所以不進小人所以不進

大抵宦官有以陰主之也疏入不報已酉言事者
誣知州劉公榮御史湯公隸妄言朝政嫉君者因
疏君名下錦衣獄君身親三木僅餘殘喘神色自
若無所曲撓供詞畧云智與今湯隸等來往相會
或論經筵不宜以大寒大暑輟講或論午朝不宜
以一事兩事塞責或論紀綱廢弛或論風俗浮沈
或論生民憔悴無賑濟之策或論邊境空虛無儲
蓄之具議者欲處以死刑部侍郎彭公韶辭疾不
為判案獲免已酉左遷廣東石城吏目毅然就道
衣結履穿幾不能存親識饋遺堅卻不受在官盡
心政務廢陞舉舉而持已清白纖塵不染稍暇則
從白沙陳獻章先生遊篤志聖賢之學所造益深
矣辛亥十月卒於廣東得壽僅二十有六卒之日
囊無百緡左伯劉公大憂君同年進士順德令吳
公廷舉資之還其家君介直孝友取予惟義雅角
奇氣與人寡合處事慷慨無阿比之習今上首登

大寶明日常朝用御史二人侍班糾儀湯公鼐輪侍君造具私第告曰祖宗盛時御史糾儀得面陳政務得失言下取旨近年遇事但惟退而具本此君臣情分所由間隔不通也公以言官奏對幸值大政維新之日請效盛時故事此太平機會也及王公起徵聘至京君曰三代而下人臣不復見君所以事事苟且老先生勿受官職先請見君嘗政之不便者歷歷陳於上前庶其有濟一受官職再無可見之時矣二公雖善其言而卒莫能用職者憾之其據經守義大率類此一時權豪貴戚聞其名爭請訓其子弟拒而不納亦不妄登其門忠君愛民之心久而彌篤富貴利達視之漠如也詩文清助平實不為空言有直辭遺文若干卷行於世崔銑曰嗚呼古義不明古人不復世之素號為士大夫通經術者立乎人之末朝則唯唯默默偷以全軀孰有如君之忠直乎於權貴貨利也見之則

韓尾諱之則垂涎孰有如君之剛義乎弱冠之年
無導於前卓然自樹其孟子所稱豪傑之士乎假
之以年所就殆未可量然執此以往則固青天之
日斷斷乎不可磨沒是大有功於名教也故為之

立傳以詔天下
後世云

張鶴鳴王雲芝傳

公諱勅字嘉討登第後御筆更
字懋倫別號雲芝後易為竹泉

歷下人也成化甲辰賜進士一甲第三人公少有
仙骨穎邁絕人諳書華不注山東臥牛山寺嘗與
友人趙壁晚眺見山坡光疑為夜燐公不言但夜
分持石誌火發處積石城累一夜潛發之二尺許
得石匣函書二冊展讀一年後能知未來休咎御
風出神語人曰地如篩子眼地下珍異幽奇皆可
觀人半疑信之弗測也時與一僧侶相携山頭採
杞葉持棗先下比僧扣門公已在門內僧訝之公

笑曰我從裏間到來和尚自不知耳兩司梁蜀學
憲一日集諸生講學衆俱見白雲一片起公即遣
騎戒疾驅數里雲落處即掘之果得白石如雪命
煮之細切如腐徧食諸生甘美非人世味公曰此
雲母也大梁試士鎖院憲廡皆滿每處輒有一公
危坐終日諸士出相語各以為近公危坐處惴惴
弗寧也在輝縣山坡下掘得大石玲瓏蒼翠不類
人間石置之百象上今浸入豪家又在道傍古垣
間紫石硯二池各有鴛鴦一隻雄雌相向余問公
孫國子生幾云少猶見此硯後不知所在公以南
國子祭酒家居前採把僧疾將逝矣公問曰富貴
何願僧曰願兼之公曰惜也功行未滿且著蜀府
為二子王因批其背如所語比蜀王產第二子背
上隱隱有此字王厚之而沒尹太常足履疾詢其
大朗公曰有大鶴入幕飛旋已脫去公之神也至
日太常逝果然公預知死則安著易道服而瞑曾

與王公陽明登佛山夜見帝星輝耀陽明曰此在江右公曰勿誤此自江漢間分野耳陽明深服之合計公生平異蹟益東方曼倩李郭侯之流亞云嘉定二峩山猪肝洞嘗有道人居住其間一日題東嶽廟壁云教化先生持意來世人有眼不能開有人識我真名姓我是終南呂秀才公時按部至一見即識具仙筆令錯其字墨透无竹遂取去按張公今歷城聞見最確同時有潘公雪松亦著公行畧云

楊慎林母兩世貞烈傳

林母者何成都林景元妻謝氏也景元亡時年僅二

十四子名森夫周聘其姑劉氏憐其少齡子幼欲移所天謝堅不從適以子托乳媪自後於井中幸缺甃淺泉救之獲免乃聽其守志森長為娶韓氏年二十八而森卒子軌方五歲業勉資養親鄰咸

勸其他適韓曰吾姑年少失倚尚克哺吾夫子成
立吾年差長子又離禪其忍棄姑養移夫天乎迺
絕嗣澤局圭竇力織維姑婦拮据備歷冰蘖子既
以進士起家孫曾滿前人以爲兩世貞烈之所致
云右事戴四川總志及古今烈女傳余覽而重有
歎焉婦之節猶木之節也木無節不林人無節不
貞世衰教弛違之甚矣傳其軀礪俗垂訓國之大
義家之大關也然閭閻之下湮沒而不傳者多矣
升於載籍者僅百之一二耳即以近臣吾蜀之事
證之明玉珍入蜀擒元平章濟格岱妻其妻義不
受辱自投於江同事叅政趙資妻玉珍以禮待之
未死立於陣前招資使降資曰癡婦不死何待不
見濟平章妻乎引弓射之殪同一死也而濟妻烈
矣事見驅除錄又瀘人傅劉貞作費烈女嗟曰永
康費氏女年少才十九至正十七年太歲次丁酉
逆賊從東來旌旗搖北斗唐姬與姜氏不慙爲賊

偶費女弟潛然勤勤告父母人生棄禮義犬豚亦
何有夜深盛容飾自縊後園柳高義感行人痛心
如疾首平章瑪努勒者左丞韓叔亨低頭雙屈膝拜
賊乞餘生費女生草野烈烈起凡倫二公國柱石
棄節如輕塵芳名與穢跡遺戒千百春為呼伯夷
雖賢得孔子而名益彰華門邁軸之士不附青雲
如伯夷者亦與卉木同盡况媼孀乎林氏有子而
顯固貞烈之報亦天定之勝不幸如即妻費女僅
得於傳聞久將湮沒余故附之
林氏傳亦漢人象類求之例也

吳國倫艾姬傳

艾姬者蜀之什邡縣艾榮女吾友
陶弼令婢竹時納為小姬初陶娶

於黃無子而善妒嘗納吳氏姬生一子且數歲黃
陽愛之因勸陶再納黃氏姬益黃姬即其兄女性
悍而有妖態計納之足以薄吳姬寵而危其孤也
陶尋携兩姬之綿竹果不相能無何黃亦自往助

之初入廨即撫吳娘子陽泣曰久不抱兒兒瘠甚豈小婦不善視兒耶陶信以為愛也遂不復有他慮會兒有微疾而陶適役於外二黃陰賂醫酖殺之且自吳姬曰尚能恃兒惑吾夫否已陶知兒死二黃手而莫如之何第遣與吳姬俱歸吳姬遂見遂為農人婦矣故陶得乘是時納艾姬艾姬年始十七端好寡言笑有寵於陶後陶遣姚安別駕携艾過家與二黃異居二黃竊恨之已陶又坐事貶開剛叅軍獨携艾姬往黃愈不能平嗾黃姬往制之比至則艾姬退處一室曰寧絕吾進御毋寧使官廨有惡聲污吾夫名是時陶已踰五十無嗣自憤為妒婦悍妾所制鬱鬱成疹死黃姬恬不為哀第自括其裝中資為再適計獨艾姬抱屍撫棺哭七日七夜不食而死死之日屬其從者曰吾從夫子地下無恨矣幸焚吾屍裹吾骨以歸庶幾禘夫子之餘上藏焉從者如其言以骨從陶柩還至家

黃循如未已大罵曰婢子安得祔夫辱瘞具骨環垣下且迨其上曰婢子安得有冢乃所謂黃姬者業已不用命而自嫁夫矣嗟乎悲哉艾事陶未久且非其正御也而能慨然以死殉可不謂貞乎彼婦之妒不有其夫而忍於翦其嗣又何有於殉夫之小姬也後三年黃以惡疾死又二年郡牧楊仁甫始遷艾姬與陶合葬而為文祭焉

王世貞楊廷和傳

楊廷和字介夫蜀之新都人十

庶吉士始告歸娶廷和為人美風姿性沈靜詳審為文亦簡暢有法而不好為聲律華藻之學惟以考究學政民瘼邊事及一切法家言葢鬱然負公輔望云授檢討滿九載進修撰憲宗實錄成以預纂修進侍讀改左春坊左中允日侍皇太子講讀主順天試復且滿考而修會典成優拜左春坊大

學士兼翰林院侍讀學士復主會試皇太子即位
推思進詹事府少詹事兼讀學如故充經筵講官
為學廟實錄副總裁尋進詹事專領內閣誥勅當
進講時所稱速佞幸戒遊逸失中貴人瑾指傳改
南京吏部左侍郎既行而有為廷和解者去詹事
之五月而遷南京戶部尚書又三月上問楊學士
何在瑾以南京戶部對乃召入進兼文淵閣大學
士參預機務明年加少保兼太子太保時重修會
典與孝廟實錄先後成諸纂修官屢當時遷而瑾
意有所修怒屬廷和皆預總裁於是先摘會典誤
廷和與大學士李東陽等奪俸二級而以實錄功
遷之明年加光祿大夫柱國再遷改吏部尚書武
英殿大學士時瑾橫益甚而大學士芳吏部尚書
繇為中外嫌廷和與東陽委曲其間小有所劾刺
而已尋安化王自夏州反以誅瑾為名廷和等乃
稍自舒吐草赦詔且請擢邊將仇鉞以離賊黨而

鐵果乘間報安化王會瑾錄中貴人張永發伏誅
廷和等乃復論功進少傅兼太子少傅謹身殿大
學士子一中書舍人流賊劉六劉七齊彥明反
左都御史馬中錫當帥師往討之廷和言中錫文
士也寧能當此寄時業已行果不能平賊廷和請
途中錫下獄以待卽陸元代之而斬故受賕縱賊
者叅將桑玉已又薦都御史彭澤將諸邊兵討河
南賊趙瑾等時輔臣東陽病多委計廷和以是賊
斬平論功錄廷和一子錦衣衛千戶辭特加少師
太子太師華蓋殿大學士中書人張永狹奇俚瑾
而駭訶得男子有龍文於臂者以為功援故中貴
人劉永誠例身欲得侯廷和謂封永誠之從子聚
伯耳且自以戰功封非永誠身受之也永意乃塞
亦不能為廷和怨彭澤將而討流賊駭本恕等入
問計廷和廷和曰以君才賊何憂不平所戒者班
師早耳澤後破誅本恕等奏班師而餘黨復崛起

不可制澤既發而復留乃數日揚公之先見吾所不及也乾清宮災廷和請上避殿下詔罪已求直言因與其僚疏勸上早朝晚罷深居簡出躬九廟祭崇兩宮孝養勸日謀復而奏開言路達下情還遣兵革禁市罷皇店出西僧省工作減織造几十餘條皆切至而上不省葬以父春喪乞歸持服不許三請乃許奔喪使中貴人護而行起之復三疏辭始許閣臣之得終父母服自廷和始也服甫闕即召入時上出行遣使使賜廷和羊酒稽幣廷和疏謝因請迴鑿不報復與大學士蔣冕馳至居席願得以身出塞請上乃遣中涓阻之歸廷和之初奔喪實首揆而梁儲代之儲故同舉進士先貴而長於廷和十歲累遷至少師首殿矣至是讓居下時頗稱儲誼嘗廷和之任事上往往不視朝尋周穆王之轍廷和等數上疏諫止不聽而他如優寧王護衛貴諸義子乃至自稱威武大將軍鎮國公

尤諸失政之大者廷和亦強諫俱不聽以是邑邑不自得數稱疾乞骸骨上不聽當是時上寬大好佚遊於章疏不甚省而中貴人谷大用魏彬張雄義子錢寧江彬輩橫甚廷和雖不為之下然不能有所裁禁以是得稍自安寧王宸濠反江西事聞上欲帥師親征廷和等力阻之上乃自詭總督軍務威武大將軍總兵官後軍都督府太師鎮國公朱壽統各京邊將士南討而安邊伯許泰為威武副將軍左都督劉暉為平賊將軍前驅鎮守撫按悉聽節制命廷和與大學士毛紀居守以乾清坤寧二宮鼎建推思鍊一子錦衣衛副千戶辭時廷和當革大將軍南征勅諭謝弗肯革上已心恚而會推南京吏部尚書劉龍理東閣誥勅以廷和私其鄉人切責之廷和謝罪乞罷不許少師梁儲等請與俱罷復不許是時廷和方閭門以病請而勅諭行矣上既南兩更歲朔而廷和頗以鎮靜持重

為中外所推服凡請上迴棘者數十疏皆不復省
上歸而駐蹕通州廷和等舉故事請上還大內御
殿受俘而後正宸濠等誅上令趣召廷和等至通
受事即行在執宸濠等慘之廷和不能爭也前是
兵部尚書王瓊材而險與中貴人及錢寧江彬等
狎相表裏為章奏誅賞遷斥捷取中旨不復關內
閣而瓊躡進亦至少師與廷和儲埒同居守又
不自抑損怙侈亦甚廷和甚恨莫能制也至是與
吏部尚書陸完皆發自張永云與宸濠通私外議
洵洵以家且籍矣瓊先驅至通輸款上左右得免
而顧奪陸完位而居之廷和以是益恨瓊明年正
月上郊祀伏而嘔血與疾歸尋益甚皇嗣未建而
司禮中貴人魏彬等至閣言國帑力竭矣搢萬金
而購之草野或有人應廷和心知所謂乃出榜諭
購而徵以倫序之說風之彬等唯唯又十日而谷
大用張永至閣來言上宴駕於豹房矣以皇太后

命移城大內且議所當立廷和業袖皇明祖訓出而示之曰兄終弟及誰能濟焉以親以長毋如興世子遂合策迎興世子而王瓊率九卿突入左掖門厲聲曰九卿之在廷我為長今日誰當立者而不使間廷和左右目遂皆不對乃蹙然散去而故事內閣當一人與中貴動戚太宗伯皆往首為梁儲次蔣冕有力志廷和欲倚以自輔而是時江彬擁重兵在肘腋間知天下之惡之勢必反廷和欲以太后旨捕誅彬恐梁儲老不任迎而故與彬善或泄之冕去則益孤乃伴儲儲憊阻其行儲奮曰事孰有大於迎天子者乎而敢以憊辭儲奉金符往而冕留矣魏彬故與江彬有連而柄司禮廷和知其稍文弱乃為詳言江彬反狀以危語脅之彬心動因俾其入白皇太后而後具啓請太監張永武定侯郭勛安邊伯許泰尚書王憲選各營兵分布皇城四門京城九門及南北要害厥衛御史以

其屬嚴干陴傳遣命罷威戎營團練諸軍各邊兵入衛者俱重資散歸鎮其皇店官校及軍門各色辦事忠勤還衛哈密上等番佛即機諸貢使皆給賞而遣之還國豹房所供番僧及少林僧諸技擊射生權和黃頭即散樂工伎一切罷遣時江彤之黨都督僉事李琮尤狠黠勸彤乘間以其家衆反不勝則北走彤猶豫未決而與廷和合謀者獨蔣冕毛紀司禮中貴溫祥凡四人而魏彤亦不敢泄之張永伺知其意亦密為備乃誘江彤入安坤寧宮獸吻行禮入西華門過永所永飯之俾小綏以待彤且行禮而速旨下彤返走西華門閉轉走北安門內監犀追而縛之因併縛都督神周及李宗下詔獄籍其家中外權呼相慶興世子至都門禮部具儀如皇太子即位禮由東安門入居文華殿受箋不許違從行殿受箋由大明門直入告大行皇帝几筵御前殿即位廷和具草詔上之報可

始草上而司禮諸中貴以其關內政者數條屬廷
和削去廷和曰往者吾儕之不得職公等謂出上
意今者亦出新天子意耶不然吾儕賀登極後惟
有一去且叩之上以誰削詔草必有當之者於是
蔣冕及毛紀相繼發危言諸中貴語塞已而詔下
正德中蠹政釐革且盡中外加額稱新天子聖人
而所革錦衣等諸衛內監局旗校工役為數十
萬八千七百減漕糧百五十三萬二千餘石其中
貴義子傳陞乞陞一切恩倖得官者殆盡失職之
徒銜廷和切骨入朝有挾白刃恫喝於輿傍者事
聞詔以營卒百人為廷和出入衛上御經廷和
知經筵事修武廟實錄充總裁前是廷和已加特
進一品滿九載兼支大學士俸賜勅旌諭至是加
左柱國而給事御史交章論王瓊罪狀下詔獄瓊
迫則疏計廷和以自解法司乃當瓊奸黨律論死
瓊力自辯得減邊戍而有以為承望者會石瑄自

禮部尚書掌詹事府改吏部廷和復奏改之掌府
使司誥勅於是人或謂廷和太專然廷和以上雍
幼冲然英睿不世出蓋自信以可致天下太平事
事有所持諍鏡寧江彬雖誅而張銳張忠于經等
獄久不決略於內亦減從戍廷和等疏謂不誅此
曹則國法不正公道不明九廟之靈不安萬姓之
心不服禍亂之機未息太平之治未臻上乃籍沒
其資產廷和復疏請敬天戒法祖訓隆孝道保聖
躬務民義勤學問慎命令明賞罰專委任納諫諍
親善人節財用語多剴切皆優詔報可而大禮之
議起時興獻王與母妃名號猶未定上欲有所加
隆召廷和等從容賜茶慰諭而廷和持以為上當
後孝宗稱孝宗曰皇考而獻王為皇叔考爵曰興
國大王母妃曰興國太妃而別立益王之次子崇
仁王為興王奉獻王祀禮部因之以請上弗悅而
進士張總有所窺見遂上疏言上宜考獻王母爵

妃宜崇以帝后號且持繼統不繼嗣之說甚晰語見摠傳自是廷和每召對上必溫旨諭之而持不可者三封還御批者四前後執奏幾三十疏上益忽忽有所恨而左右得乘間言廷和恣無人臣禮言官史道曹嘉等亦遂論劾廷和上雖為之薄譎以安之而意內移矣尋脩定冊功封廷和及蔣冕毛紀各伯爵歲祿千石固辭改廢錦衣衛指揮使復辭上以賞太輕加廢四品京職各世襲復辭而會廷和滿四考起拜太傅復四辭而上特賜勅旌異錫宴於禮部九卿皆與焉時上頗留意齋醮廷和力言其不可引梁武宋徽為喻優旨報納時江左比歲不登而中貴人以御衣請遣官之燕杭二府督織造工部及給事御史言之皆不聽而趣內閣撰勅廷和等不奉命因極言民困財竭請毋遣官上仍趣撰勅且戒以不得瀆擾執拗廷和因力辯其非瀆擾執拗且謂臣等與舉朝大臣言官言

之不聽而獨二三邪佞之言是聽陛下獨能與二
三邪佞共治祖宗天下哉且陛下以纖造為累朝
舊例不知洪武以來何嘗有之其創自成化弘治
始耳憲孝二聖恤民節財美政非一陛下不之法
而獨法其不美者何也即位一詔中官之俸路絀
塞殆盡天下方傳誦聖德而今忽有此何以取信
因請究擬旨者上為謝不審俾戒所遣官毋縱肆
而已不能止也廷和故已累疏乞休其後請益力
而又以持稱考獻帝議不合疏辭露不平上責以
因辭歸咎非大臣道然猶賜之璽書續與康郵發
如例申前詹子錦衣衛指揮使之命給
事御史請留廷和皆不報而蔣冕代

陸光祖陳以勤傳

公諱以勤姓陳氏字逸甫別號
松谷一號青居山人母免身時

夢一星如月狀光燭庭塔驚而拜之忽有神自天
下授以研夢覺而公生嘉靖辛丑成進士考庶吉

士癸卯授翰林院檢討壬子八月充裕邸講官丙辰冬九年任滿陞修撰戊午進弓經局洗馬兼侍講初兩邸並建位號未定世廟春秋高殿閣儲嗣事他邸宦侍規望非分萬一或於宮掖中造設機鍵不得動則為飛語中之分宜如彌遠新恩之說饜端叵測公及新鄭相向攢眉高闔調護密啓穆皇慎起居戒邸中口語無輕洩焦心瘁志髮為驟白一日分宜子世蕃以父命召公及新鄭語曰聞殿下有少嫌於家大人信否新鄭解紛不甚當竊公獨壯語曰觀皇上命名與尊公之題講讀官君臣之心固久定無可疑者也殿下名從元從土明示承乾御宇意故事藩邸講讀官以二檢討充之裕邸獨用一編修以示崇異是尊公將順聖意安社稷殿下洞鑒尊公何嫌之與有世蕃入語其父猜嫌立釋公侍裕邸幾十年在諸臣中勞最久穆皇亦注念特甚常手書忠貞二字及啟發弘多

四字以賜他思數養予不可勝紀庚申九月聞外
艱特賜祭仍賻金五十兩路費稱是綵緞八表裏
而辭曰勉以途遠天寒切宜珍重語辛酉上命景
邨之國公北面稽首曰此社稷蒼生福也癸亥三
月起復除原官甲子二月陞侍講學士掌院事總
校永樂大典再陞太常寺卿管國子監祭酒事乙
丑陞禮部右侍郎尋轉左丙寅改吏部左侍郎兼
翰林院學士教習庶吉士時高文端公為大宗伯
入直撰鉅儀諸文次且及公高戲語曰公向不肯
作青詞今何如公曰安知我不能力辭迄不與事
高公終以此致人言拊髀曰吾愧陳公多矣丙寅
十二月二十六日穆皇登極公以從龍舊蒙召見
賜齋加等丁卯二月手勅原講官陳以勤陞禮部
尚書兼文淵閣大學士同徐階等入閣辦事上之
踐阼也天下顯顯想望太平公乃首上謹始十事
疏一曰定志二曰保位三曰畏天四曰法祖五曰

愛民六曰崇儉七曰攬權八曰用人九曰接下十
曰聽言奉旨嘉納四月充世廟實錄總裁官知經
筵事以重錄永樂大典成加太子少保兼武英殿
大學士九月以大慶加少傅兼太子太傅穆皇教
尚淵默自朝講外帝與羣臣見奏章每下閣臣條
旨亦不甚可否而貴近乘間多錄內降得橫思公
憤之上勵精脩政四事疏其一請司禮官將每日
章奏類進擇便殿一一覽驗施行庶政體以漸明
習且令左右不得窺其隙其二言上紹位漸久神
明之斷未彰成福之朽稍移宜躬親決事時有所
予奪採縱以收大權其三請非時延見大臣發清
問俾之日對狀以流通精神決去壅蔽其四言旨
從中降者漸不可長宜裁以法使執常伯之職近
日月之際者有嚴心而不敢肆四事皆披肝膽觸
忌諱他人所咋舌不敢道者穆王覽之稍感悟庚
午三月滿從一品考賜羊酒鈔錠給授柱國廕一

子中書舍人時內江趙文肅公初登政府銳意有所建登新鄭再起與文肅相引重然其趣有公和意氣若款密而中實矛盾江陵且文閣其間文肅未之悟也公見之歸志遂決自以荷國深恩無能報塞因再上時政六事疏一慎擢用二酌久任三懲賦吏四廣用人五練民兵六重農教奉旨所奏深切治理具見忠猷是年秋公連章乞骸骨上降溫旨慰留再四始得請加太子太師吏部尚書致仕賜重書嘉獎給驛遣行人護行有司月給廩役恩禮濃渥近世罕儼越二年今上登極公貽書江陵勉其保聖躬輔聖德勤聖學每聞朝宁間善人登用眉端栩栩增色或事不當意必頓感久之具盛德光美見於綸誥所褒予者不一而足穆皇勅諭稱公曰淳德應期宏才命世非堯舜不陳有朝夕納誨之益以社稷為悅有左右調護之忠又曰履正奉公心克勤於體國集思廣益量每廓於容

賢又曰嘉猷入告常先天下之受正色入朝深得
大臣之體奉令上勅諭稱公曰難進易退此然舊
人之典刑後樂先憂卓爾大臣之風節天語卿重
一時所未有也公貌古氣清度量宏遠人莫窺其
際常自言朝廷置輔設參當以協心幹國為務其
果於自專不樂人言過於引嫌不肯盡言者皆非
也又言吾輩當以成福歸主上公議付大廷寧使
蒼生受利而已無其功自古賢豪功名彪炳皆後
人所折慕而述之彼其人固無喜功名心也一有
此心其設施舉廢必且乖隔矯拂何功名之足紀
故隆慶初嚴廊畫一海宇晏然公所匡持調劑居
多學問以倫紀為大宗踐修為實地謂聖賢盛慮
必自於細行始克彛事業必自一介不取始故終
其身天彝修飭即一舉動左規右矩不失寸尺燕
居必具衣冠斂足危坐終日無惰容言必稽古名
教惟立節砥行為兢兢為文初學馬遷後宗曾子

固晚則涵融閎肆自成一家大都氣完而力充沈鬱而有致近世聲牙棘澁峻削鉅釘之習抹然殆盡既參大政不復修詞人業古今名臣拯患扶傾解紛應變之蹟手書大帙撫卷沈思若身周旋其間而求為之處者丁丑少宰補日講官公寓書勉之曰人皆以世侍禁幄為光榮吾意不然蓋講臣陪密勿無顯然可紀之功然日陳說德義或於上心有開悟即利澤加天下不貲此昔賢所欲踴躍而效之也庚辰春少宰以公年七十懇請歸省上俞允且念先帝舊學特命撫按官具禮存問仍出尚方綺幣寶鏹以寵之人謂是後也有異數三馬廷臣非六載不歸省少宰守官踰兩期得以傳行今甲大臣致仕非九十不存問朝臣謝事非因緣國慶無由沐恩賚公非時蒙特賜甚渥中外咸豔慕之公卒之前一日有大星自東南墮一郡皆驚蓋適與母夢符云公生於正德辛未終於萬厯丙

戊六月十九日享年七十有六配王氏封一品夫人子于陞于明于陞隆慶戊辰進士官吏部右侍郎兼翰林院侍讀學士于明早夭三世俱以公鼎貴贈光祿大夫少傅兼太子太傅禮部尚書武英殿大學士配俱一品夫人嗚呼以當世廟末年猜嫌起於父子安危繫乎社稷公於杯酒談笑間出一二言解之得相之才上稱皇三疏卓然可見之施行得相之畧健而引疾眷而乞休無卻而先避未缺而遽止得相之智立朝三十年一以忠誠自結人主貴溪分宜勢炎炙灼人無能以毫毛加公之上得相之節論聖賢德業在勤小物嚴一介得相之學平章象石歸覽自涉金闈衣鉢父子繼承未六十而引年未八十而存問得相之福余小子未公者止此至於總其始終核其巨細則有史臣之汗青在焉不具載

范謙陳于陸傳

大學士陳于陸字元忠別號玉壘山人其先閩人也自彥良徙南充

之水西里世為水西陳氏當元至正間公九世祖曰興祖數傳至銜為大理府訓導其子信貢為太學生信生大策大策生公父太傅公以勳自銜至大策三世並以太傅貴贈如其官太傅為翰林檢討時生公長安邸第朝夕比鄰數人夢天梁填填導一羽衣入太傅公所旦而公生既長犀角豐盈太傅絕愛憐之即課讀不甚亟而公自喜學益甚所綜撰立數千百言俱如太傅意所出太傅愈益喜曰兒類我辛酉年十七舉於鄉未午脫稿敏甚監臨者怪問何年少而穎若是名孰何公正色對曰茲非通姓名地也蓋是時太傅已起宮端浸貴盛戊辰二十四成進士高等選入中祕而太傅業已相矣每間試太傅輒引避弗預閱卷而公試輒泉然首諸士庚午授翰林院編修歷修撰講讀數

年擢洗馬已擢詹事府詹事兼翰林院侍讀學士
掌院事又擢禮部右侍郎尋改吏部自右徙左秩
滿擢禮部尚書掌詹事府如故其明年入參大政
自吏曹至相凡典文衡者三直日講者再所得士
及獻納為多相之日距太傅二十七年明興二百
年父子拜相者始見公時論榮之公亦自以遭遇
尤奇思得當以報上是時上方深拱羣臣希得見
以言斥者至百數吏治惰窳兵食消耗公私心憂
之疏為六事以獻其一曰接見大臣謂天下猶一
身然君為之心心之不運身於何有以肅皇帝之
明聖而一勅於勤晚節可觀陛下自視孰與肅皇
帝自肅皇帝不能以是為安臣有以知陛下之不
能也請亟修朝講召對之典以決壅蔽其二曰錄
用人才謂言者本以懃直獲舉非有他深過可棄
必終銅之令稿項黃馘以死國家曾不得其一割
之用非所以計社稷也請自今天曹以屢薦者列

聞惟上所不則與衆斥之使歸於上而賢不肖無所溷三曰勸獎外吏謂今時重內亟矣要以親民宣化則守若令為政願執不移等而今豪杰詘乎宜倣古制及祖宗初意行取之典雜及州守舉貢郡守考最得其次擢京卿諸撫臣當代視內外賢者參用之以示天下無不可得之效各務磨濯以自見四曰清查邊餉謂歲入不過五千餘萬邊餉乃至三百三四十萬矣天下財產安得不蹶請慎簡邊計之臣今奉專勅得漸汰虛浮即不能如先朝舊額亦宜視近規為中制而止五曰儲養將才謂武科黷齷既不足致異材請以薦用者又旒據紙上空言一再不效而絀請自今以武勇薦者必下公卿大臣共覈之各試以其能具有拳勇卓絕請不登武舉之科者別立科羅之六曰擇用邊吏謂吏治最要而邊為甚以其內撫民而外禦侮非習邊不任也請別為銓法擇與邊宜者吏之有

功則增秩久任諸生中閑於武者督學得自選待
用庶幾任環董邦政輩可復起也上采其議多見
之行公性惻款居恆若不能道辭然遇大事廷臣
即未言公輒言言又切至自在鄉貳時已一再疏
請冊立東宮及臨朝講至是益以為地密責重非
以時啓沃輒難報稱而又適國家多故愈益發憤
故據所欲言冀幸上之一悟化之一更也會是年
冬言臣斥者二十餘人南北臺省幾空公從輔臣
申救不已則又疏以為齒馬技鼠自古記之今法
行自近不足煩白簡且臺省建白自有主名又或
遠在南郎或奉使各省意外株連不知罪本兼其
平日固有觸宸嚴劇貴近者聚而罰之是言亦罪
不言亦罪臣恐天下有以窺陛下淺深謂陰惡其
直而陽以嘿斥之從此士務默默即有奸蠹誰當
糾發疊疊數百言直而且婉雖不得請而中外翕
然稱之公自隨太傅舍則習聞國家訓故又該覽

諸家所撰結以為寶錄寶訓會典諸書率與不相屬亡以示後且使天子一旦思觀祖宗便宜故事及諸先臣善言懿行安所持而獻上因疏請纂修如宋正史既得詩則日夜編摩鈎校不遺餘力雖既相事日益劇而公尤拮据不懈諸詞臣以草呈者亡慮數十家公必為字栴句沫之省覽曰有程或不暇給輒夜繼之如程乃止以為常幾欲旦暮藉手以獻天子然公竟以此億公初素彊亡恙後稍病胃然亦時時愈比乃益數即又劇公自視其手理屢甚私憂之意欲解而西歸顧獨念受國恩厚固當奉職死節官下終不願首丘矣故雖疾猶強視事率以分獻南郊不任風寒疾作卒年五十有二天子為哀悼輟朝賜御祭金錢雜帛少府供張又命皇長子以其意往賻之儀部郎一人持節護喪歸發水衡錢輟近臣董宰復土起墳如太傅制度追贈少保諡曰文憲部門輓送車數百兩道

路皆舉音以過哀世侈為異數而賢士大夫憂時
艱者率相顧歎歎以為時方多故而國家乃失一
良佐公性至孝自太傅乞身公扶侍歸里第太傅
輒趨公入待及侍講幄至親切矣然未嘗三年淹
也當太傅七十時公特乞歸省上因命使者存問
太傅而公踞日舞綵奉鵬為太傅壽又日造請里
中諸耆舊故與太傅驩者相從劇飲為樂太傅雅
愛嘉陵黛玉之勝公為構樓其椒集唐人詩涉江
樓者為絕句若干首每大傅與客游輒命歌以佐
飲太傅遊而樂之太傅著有說約語寄至訓太傅
沒公哀思不已奉其子澤襲而寘之座右一頓笑
有不如說約指即痛自刻責曰吾乃負吾父嘗自
以為物禁太盛即吾兩世繼責何惡以堪之深自
貶損約救舍一肉脫粟之飯身自衣皂綿夫人以
下三澣衣布蔽膝蒼頭廬兒數十指皆家產子推
魯質朴無裘衣大帟者以是為惜福持盈然亦性

澹素非強飾也生平厭取予自期在里未嘗以扶
毫千人入東樞軸尤謝絕賄遺門無雜賓泊然如
水卒之日檢其囊僅成殮事其廉如此然好周人
之急三宗賴舉火者數十人戊子巴蜀早甚公為
設粥食之多所全活公廣頤長目美鬚髯骨隆隆
起望之蒼然若古柏喬松又多隱息皆壽徵也顧
乃及中壽止先其出犯中台占於輔不利人私慶
公公竟當之蓋天云公故善屬文常言撫子自以
其文如萬斛泉隨地而出行止一寓之自然斯足
以狀文之樂矣至於觸山礙石傾仄洄洑澎湃激
越無不自得此良工獨苦而撫子未之及也益成
之易則不工不工則不傳不工不傳之文為之不
如其已所著有萬卷樓稿若干卷世多有之學士
為之語曰前有眉山後有南充言父子俱擅文又
蜀產也然公父子故不以其重贊曰余益聞陳故
胡公後帝舜所出也公豈其苗裔耶何父子相繼

之盛也公嘗語人曰吾居蜀言蜀寧靜澹泊吾之師也余考其行事良是聲稱爛焉為公輔尅有以也夫公故盛年天子倚以為重而竟早卒豈非天哉假令浸假之年如其所欲售當與閔天散宜生等爭烈矣

劉之綸張振德傳

張公諱振德字季修崑山人觀

母娠祝再來生彌月祖抱視云再來耶即笑異之曰吾家羊叔子也小字曰環號峴峴孩焉幼讀出師表而泣作求忠於孝論授經養親二十六拔雋太學稱二張益公與雲間太史公瀛海也授興文令番漢雜戍土壩三尺公至即嚴出入寓拐之禁苗獻金公裂書卻之臺司重公併署宜賓長寧皆稱廉辦天啟辛酉奢酋反重慶殺大吏以下橫行公甫出棘閣馳歸守禦賊碎薄城公督鄉兵血戰援

絕。勅次子緄曰：我為國死，若母若二妹，為我死，汝不可死。亟出請援，或可濟。夫人以袍覆緄，額曰：我二人不見汝，冠矣。公自以長纓繫項，曰：君子死，冠不免。兩臂縛，二印右手持刀，危坐一騎，突入。令降公，瞋目罵之。越宿，又挾金至。公曰：我肯餌賊金乎？又叱去。乃望闕拜曰：臣生不能殺賊，一死報國。入視夫人錢氏、女淑昭、淑慶、僕婦蘇氏、沈氏，皆刎。積薪上，公命舉火。火熾，亦自刎。次日見尸，墟礫中，臂猶繫印。家人顧美亦死焉。事聞，上震悼，贈光祿正卿，賜祭葬，建坊祠，諡烈愍。廕長子紀錦，衣衛千戶。

劉道開巴令王子美傳

庚辰之役，余從棘關中，晤西江舒君魯直，為余言王

子美制義之妙，且曰：今科必售，非吾輩所及也。會余及丁潤生朝棟，亦素稱子美，能余心識之。撒棘後，果棄然淡墨矣。余方落第，獨以聲氣訪之一見，握手若宿契。然比秋選，即得巴縣。子美以地方利

病諸余余備言凋劫狀子美唯唯明年春正月余
抵黑門子美以二月莅任巴縣故羶地錢糧十一
萬有奇詞訟盈庭前令無不滿載歸者自子美受
事局而一更輪納使自封投櫃耗羨悉蠲詞訟自
上司此問外餘片紙不罰願請息者聽之於是喧
闐之場化為闌寂之區草長雀羅蕭如也時王氏
傾倪氏構成大獄叩閭者號曰本頭凡數十人附
和者又數倍羅織平民傾家破產翼虎縱橫道路
以目子美一以清靜鎮之德禮所薰兇箠為之少
戢日進諸生於庭與談舉子業循循善誘畧無倦
色街齋集書千百卷閒以弓矢暇則學射謂人曰
此多事之日一味賦詩無濟也直姚黃賊犯境子
美躬執錫率民兵千餘往禦之賊雖退而壯氣亦
復可觀壬午分典鄉闈以一破取元兩座主莫能
易得人稱獨盛癸未冬闖賊入關漢中瑞王以避
難來而蜀撫陳士奇亦移鎮巴縣羽書旁午客兵

屯考館餽軍需整辦不乏然後知子美非一於清
靜者也甲申春獻賊入夔門勢同破竹一時當事
共作慶堂之燕獨子美憂形於色日坐城上為糊
繆計余自辛巳居鄉去城三十里六月十四日入
城晤子美於南紀門相對嘆息余曰事不可為也
盍作變計乎子美曰城已與亡萬無逃理余曰公
即當死宗嗣不可不全子美頷之乃託其門人密
謁公子出余與子美灑淚而別是月十八日賊抵
城下差一騎繞城說降子美詬罵自發砲石擊之
至二十二日辰時城陷賊坐演武場縛瑞王陳巡
撫關南道陳煥重慶知府王行儉及子美至賊問
何不早降陳無高已打落含糊不成語有一人伏
地云權不在已乞垂鑒憐子美奮起以足蹴其背
云大丈夫死則死矣乃向盜賊求活乎時暑甚賊
各給茶一盞某人接茶子美奪而擲之罵不絕口
賊大怒曰汝安得速死命以鈍刀割之凡三日夜

乃絕故死事諸人中惟子美為最苦最烈余有族
子在旁親見之非風聞也憶子美文藝中云起自
儒生殺人而色不變為人所殺而色亦不變嗚呼
豈虛語哉賊去重慶後明年隘將曾英統兵至余
乃入城哭子美於演武場求其屍不可得為設薄
祭延羽流誦經以薦之有祭文一篇及詩一首文
稿不存詩云臣死封疆職自然書生文弱亦堪憐
撫臣有算惟操命縣令無名只對天一笑淪刀神
合漢千秋化碧血歸泉洪都夜冷柴門月幾度淒
涼聽杜鵑賊隨破成都直指劉公之渤從容就義
又有某縣令握刀自頸閭室舉火灰燼
之餘惟握刀之手不化與子美並烈云

論

宋李昭玘八陣論

兵陣之事有不可以言者有不得
不言者衛靈公在諸侯之任當以

守法為勝不當問陣有不仁之資宜以修德為務
不宜問陣然且問之此孔子所以不對也所謂不
可以言者也然孔子不對衛靈公之問將以立教
爾至其自謂則曰我戰則克其請伐罪則曰以魯
之衆加齊之半宜可克是則使孔子中天下而立
定四海之民其行兵用師之際必有道矣其不肯
驅烏合無律之民以用之立死之地決矣當是時
也兵陣之事將習之不暇而況於言乎此所謂不
得不言者也世之不善講學者恥於戎事之不知
則未嘗不以孔子問衛靈為藉口彼不知孔子之
闢其旨有在而文事必有武備乃吾儒之所當言
儻曰吾知道而已兵非吾之所知其不當問者闕
之以此而當問者亦闕之以此是毋乃拘而害事
也哉儒者之於天下亦何所用也哉今天古之用
仁義之師者莫如武王為王者之佐者莫如太公
為武王太公者疑若專以曲直老壯為定計凡獲

殺之機布設軍勢之事當絕弗道而其六韜之書
乃有烏雲山兵烏雲澤兵等篇其所以較勝負利
害之際者甚詳豈武王太公至是而變仁義為詭
詐耶直以為德之不懷則兵之必用則凡所以御
兵制敵之道不可不講之耳然此尚有可諉者曰
六韜非太公之書蓋戰國相傾之士借太公以為
市者至於詩書為帝王之遺迹豈復有可議者耶
而有扈之役則曰左不攻於左汝不恭命右不攻
於右汝不恭命御非其馬之正汝不恭命牧野之
摠則曰今日之事不愆於六步七步乃止齊馬不
愆於四伐五伐六伐七伐乃止齊馬宣王征徐方
之詩亦曰綿綿翼翼不測不克又何敦陣整旅之
能廢也夫左治其左右治其右六步七步之旅進
不可不同心四伐五伐六伐七伐之擊刺不可不
併力與夫綿綿以為奇而使敵不測翼翼以為正
而使敵不克自帝王之時已然而書與詩載之未

嘗以為恥後世之士乃獨恥言之豈非好名而不
適實之弊哉蓋聞古之制陣其名不一有以三才
名者日月星辰斗杓一左一右一前一迎一背謂之天
陣丘陵水泉亦有左右前後之利謂之地陣用車
用馬用文用武謂之人陣此三才之辨也有以五
時名者春為牝陣弓為前行夏為方陣戟為前行
季夏為圓陣矛為前行秋為牡陣劍為前行冬為
伏陣楯為前行此五時之辨也有以四獸名者使
商人為前兵象白虎使羽人為前兵象元武使徽
人為前兵象朱雀使角人為前兵象青龍此四獸
之辨也有以五行名者木之直金之方火之銳水
之曲土之圓此五行之辨也凡若是者同類制名
固不可殫數而八陣之名猶為異同若所謂一方
二圓三牝四牡五衝方六車輪七架豎八鴈行是
一八陣也若所謂金木水火土天地人又一八陣
也若所謂車箱洞當金車上中黃土烏雲烏翔火

折衝木龍騰却月水鴈行行鶴鶴天車輪地虎翼
人又一八陣也紛紜異口其無定論如是至於天
地風雲龍虎鳥蛇以是八物制為八名兵家者流
於此多歸焉則八陣之定論亦有在矣然是八物
者亦信其所從名之當否耳考其根底陣之所以
八者自有所祖述蓋其法肇於黃帝具於成周而
變化於諸葛孔明非諸葛孔明之獨能為是也昔
黃帝潛通八卦而建一都之法默會九天而設三
軍之制是以周公則而象之以九夫為井四井為
邑四邑為丘四丘為甸四甸為縣四縣為都自九
夫之井至於四縣之都而得乎一都之法又以五
人而為伍五伍為兩四兩為卒五卒為旅五旅為
師五師為軍自五伍至於五師之軍而合乎三軍
之制至於孔明則又上探黃帝之微意下採成周
之遺法因而循之與道神之革而化之與時宜之
而陣法備焉故其制為八陣自九夫為井而演之

縱橫皆八而有八八六十四陣者所以通乎八卦也止為三軍自五人為伍而演之周旋皆九而有九九八十一陣者所以會乎九天也然則孔明之所祖述者可謂深且遠矣非與夫古人之精神心術流通為一考時能爾哉李興曰推子八陣不在孫吳木牛之奇則非般模謂木牛非出於般匠之遺其說誠是若求八陣於孫吳之書則孫吳之書固無有也是不知孔明之祖述在彼而不在此也愚故曰肇於黃帝具於成周變化於諸葛孔明非諸葛孔明之獨能為是也嗚呼八陣之法黃帝既以北逐獯鬻南平蚩尤戲黎於阪泉省方於崆峒底定萬國旁羅七曜周公既以此誅紂伐奄膺戎狄懲荆舒而孔明又以此平定南中響震關輔斬王雙走郭淮殺張郃以成鼎足之強則具明效大驗已可見矣後世之言兵孰不欲得其遺法而師承之然昧其法者莫如晉之桓溫明其法者莫如

唐之李靖此又不可不知也。墨石八行行去二丈，此其為武侯之遺迹，真與偽皆未可知。而桓溫、章僚、厲之不識，遽欺之曰：「此常山蛇勢也。」夫常山蛇者，在兵法謂之率然。擊其首則尾至，擊其尾則首至，擊其中則首尾俱至。考之陣勢，特曲直一陣勢耳。烏在為八哉？且武侯所祖在黃帝、周公，而溫信於率然之說，比之李興謂不在孫吳者，尚或有愧。故曰：味其法者，莫溫若也。唐太宗問李靖曰：「卿所製六花陣，出何術？」靖曰：「臣本諸葛亮八陣法也。大陣包小陣，大營包小營，隅絡鈎連，曲直相對。古制如此，乃為圖陳之夫。驅馳於戎馬之間，識兵形陣法者，莫如太宗。而靖有六花之制，乃不知其所出。必待剖喻明白，而後悟則靖之於八陣深矣。又非守其緒餘糟粕者之比也。愚故曰：明其法者，莫靖若也。雖然，論其深妙固未易以立說判考。其大綱則不過奇正二字而已。蓋古之制軍合萬二千

五百人而為軍其為伍者一十一百二十五其為
兩者二百五十取三馬而為奇餘七以為正四
奇四正而八陣生馬是其分陣之數有奇有正也
四旋九攢以象天四平正列以象地散渙邪直以
為風前大後銳以為雲天地風雲四者陣之正也
延邪綿直以為龍蟠前合後開以為虎翼彌曼散
洽以為鳥翔回屈包蓋以為蛇蟻龍鳥虎蛇四者
陣之奇也是其布陣之形有奇有正也天子上將
居中而不動疑兵游軍出沒而無常是其用陣之
勢有奇有正也乃若陣行之疎陣戰之密其人之
列面之相向背之相承陣間容隙隊間容隊曲間
容曲前禦其前後當其後左防其左右防其右行
必魚貫立必應行長以衛短短以救長回軍轉陣
以前為後以後為前進無退退無進走雖絕成
陣雖散成行四頭八尾獨處為首先動為陽靜疾
猛厲其勢儉其節短後動為陰持重固密不動如

山其倏忽幽閻神出鬼沒十變萬態而不可致窮
則又所謂奇正之相生如環之無端者八陣之制
如此然則為今日計將欲戡亂畧可不務乎雖王
者之兵鼓之以道德征之以仁義有征無戰善師
不陣也而其不幸有頑然不服者以為權謀之助
非小補也嗟乎物不終靜故受之以動當純坤用
事則陰疑於陽而飛龍野戰當大卦既散則聖道
并起而戎馬生郊則有力吞八荒爭截九有而生
民之類騷然不寧黃帝於此順氣以作兵法文
昌以命將而又制為陣法以貽後代豈得已者哉
茲所謂生道救民成不軌而成文德也而後世經
生儒士爭非之并與孔明之祖述者黜焉一旦乘
以倉卒又變而有抗衡之事其將若之何然非黃
帝孔明者既以大謀而法之不守德之不修專以
嗜殺自封殖為事者其為生民之禍亦豈細故耶
故鄭之魚麗鵠鶴魏之鶴列晉之五行楚之二廣

二孟徒以這一己之欲而挈赤子於肝腦塗地耳其得罪於君子不亦甚乎孔子所以不對衛靈公而孟子亦嘗闢善陣善戰為民賊者豈非為此等慮者哉夫仁義權謀後世不可偏廢一於仁義則拘而不通專於權謀則沒入於詐而無以自反於正區區之慮每及乎此故歷陳武侯八陣之美以謹後世之武備而又闡魚麗檄檄之屬以終孔子沮豆之意焉

范滂八陣圖論

夔州八陣之蹟開天下歷千有餘年至存於峽口之江浦往時每過

其下惑於傳聞眩於日擊終莫得其說今蒙恩從宦於此始得以暇日登崇臺而縱觀之臺高而峻平累石於然一一歎之而無差於是推尋其意而為之說曰陣法之大要方圓奇正而已爾武侯之法前為八者八皆東嚮其勢直而方後為十二者二皆南北嚮其勢曲而同方者所以為正也圓者

所以為奇也夫奇者正之餘李靖所論握奇文是也方圓相生奇正相掇而陣法無餘事矣然前為八者八後為十二者二何也曰此分數之法皆以八計之是以為八陣也前為八者八總而計之為八八六十四後為十二者二總而計之為三八二十四凡為八者十一絕長補短而三分之以其二為正而以一為奇合為八八矣古八陣之法其別凡八李筌陰符經以為常山之勢者是也武侯之法為陣者一而已非古八陣也然而為帶山之勢者固自若桓溫之言近之矣若武侯之所以為八者未知溫能悉之否也五人為伍五伍為兩萬二千五百人為隊二百五十取三而以為奇者古也武侯之法八八六十四為正三八二十四為奇是十一取三焉以為奇則精於古矣夫奇正也方圓也陰陽也一而已矣方者其陰圓者其陽也前為方者八八六十四後為圓者三八二十四絕長

補短大概二陰而一陽其在易二陰而一陽為震
倍之四陰而二陽為臨嗟乎武侯之意僅取諸此
乎古者用奇之法或取於中或列於左右或伏於
後處於中者李靖之握奇是也列於左右者淮陰
侯與楚戰攻下之勢也伏於後則武侯之法司馬
遷書言漢與楚決勝垓下淮陰侯自以三十萬當
之皇帝在後孔將軍居左費將軍居右絳侯柴將
軍又在皇帝後淮陰侯先合不利却孔將軍費將
軍縱楚兵不利淮陰侯復乘之楚以大敗史傳之
紀軍陣未有詳於此者淮陰侯與高帝絳侯柴將
軍所居之軍正也孔費二將列於左右者奇也淮
陰侯喜以弱致人故其為奇者列於左右將伴却
而後勝武侯節制之師使奇而將出於左右者常
匿於後以固其軍正兵既有所持而奇兵唯無出
出將不可禦此司馬仲達之所避而
終身不敢與戰也然武侯之法密矣

王當五運六氣論

五運六氣之說不見於儒者之六經而見於醫家之素問夫素

問乃先秦古書雖未必皆黃帝岐伯之言然秦火以前春秋戰國之際有知和緩秦越人輩雖甚精於醫其察天地陰陽五行之用未能若是精密也且夫寒暑燥濕風雨者天之陰陽三陰三陽上春之木火上金水者地之陰陽生長收藏下應之五運行於其間即五行之化氣也天數中於五戊居之地數中於六巳居之戊巳土也化氣必以五六故甲巳化土而居於其首上生金故乙庚次之金生水故丙辛次之水生木故丁壬次之木生火故戊癸次之此化氣之序也地之三陰三陽亦五行兩而火獨有二五行之妙理也蓋木王於東火王於南金玉於西水王於北而土王於四維戊附於戌而在乾巳附於辰而在巽而未之對衝在丑故辰戌丑未寄王之位也未在西南其卦為坤

其時為長夏以其處四時之中呂氏月令謂之中
央土此土正王之位也春木生火秋金生水冬水
生木而夏火制金生氣絕矣惟土王於西而然後
以火生土以土生金四時之序循環不窮然火方
王於午土遼王於未則火氣必耗故君火以名其
氣溫而未熱相火以位與太陽同處未申之間奉
君令以行暑氣於是火不耗於土不屈於金故而
盛則庚伏此火所以獨分君相之位也天氣始於
甲地氣始於子子甲相合命曰歲立曰行四周而
為二紀天以六為節故氣以六期而為一備地以
五為制故運以五歲而為一周運統一歲於四時
之表氣分六位於一歲之中風雨燥濕寒暑其應
有候其至有期然用以占焉往往不效非素問之
無驗用其說者知常而不知變故也凡物理有常
必有變雖天地之運動往來消息盈虛可以逆其
必然者常也若其變則無所不至可知而不可必


也嘗試即其常而言之五太之運是為太過其至
先時五少之運是為不及其至後時惟乎氣則不
疾不徐其至以時其大畧如此火運上臨少陰水
運上臨太陽木運上臨厥陰金運上臨陽明土運
上臨太陰謂之天符木運臨卯火運臨午金運臨
酉水運臨子上運臨四維謂之歲會五太與在泉
氣同謂之同天符五少與在泉氣同謂之同歲會
若是者具氣和土運上見少陽金運上見厥陰謂
之運刑天若是者其氣乖此皆五運之常也主氣
各居一步厥陰主初少陰少陽次之太陰陽明又
次之太陽主終六位不遷客氣與歲推移子歲太
陽之水為初丑歲厥陰之木為初迭相往來而少
陽之氣為初乃在太陰之後半歲以前司天主之
半歲以後在泉主之其大略如此若其情則有相
得與不相得其位則有順有逆相得者木火相臨
火土相臨之類也不相得者金木相臨水火相臨

之類也父臨子則順木居少陽之位是已反此則
寒水居金位斯逆矣君臨臣則順君火居少陽之
位是已反此則相火居君火之位斯逆矣此皆六
氣之常也及論其變則有正有邪於是正有變有勝
有復有鬱有發有淫有承當時而行者正也非時
而行者邪也當時而行其過則為變非時而行其
至則為勝其救則為復抑而不伸則為鬱鬱而怒
起則為發陵其所勝則為淫極而必反則為承假
如太陽之化為啟圻而變為摧拉太微之化為暄
煥而變為炎烈正化之為變者然也少角木氣不
足清勝而熱復少微火氣不足寒勝而兩復邪化
之正復然也寒甚而無陽蹠是為火鬱熱甚而無
溼清是為金鬱抑而不伸者然也水鬱而發則為
水雹土鬱而發則為飄驟鬱而怒起者然也風淫
所勝則克太陰熱淫所勝則克陽明陵其所勝者
然也相火之下水氣承之濕土之下風氣承之極

則有反者然也然推拉之變不應普天悉皆大風
炎烈之變不應薄海悉皆燭均清氣之勝不應宇
宙無不明潔而氣之復不應山澤無不蒸溽鬱也
發也淫也承也其理皆然凡此者其應非有候其
至非有期是以可知而不可必也其應非有候則
有不時而應者矣其至非有時則有卒然而至者
矣是故千里之遠其變相似者有之百里之近其
變不同者亦有之即其時常其處隨其變而占焉
則吉凶可知况素問所以論天地之氣化者將以
觀其變而救民之疾也夫大而天地小而人之一
身五行之氣皆在焉天地之氣有常無變則人亦
和平而無疾天地之氣變而失常則疾病之所從
出也足故木氣勝則肝以實病脾以虛病火氣勝
則心以實病肺以虛病此醫者所能致察儒者不
得其詳也至於官天地理陰陽順五行使冬無愆
陽夏無伏陰春無凄風秋無苦雨和平之氣行於

兩間國無水旱之災民無妖孽之疾此儒者所當
致察醫家未必能知也素問亦略言之矣五行之
精是為五緯與運氣相應有歲星有辰星以察其
行之逆順而占其吉凶然必曰德者福之過者罰
之則是運氣之和平而為休祥有德者召之也運
氣之乖疾而為災眚有過者致之也雖然其說略
而未詳吾儒之經則詳矣洪範九疇始於五行中
於皇極終於五福六極聖人建極於上以順五行
之用是以天下之民有五福而無六極有五福皆
可以康寧矣無六極皆免於疾病此其道固有行
乎運氣之外者是謂大順成周之時嘗見之由庚
之詩作而陰陽得由其道華黍之詩作而四時不
失其和由儀之詩作而萬物各得其宜此建皇極
順五行使民有五福無六極之驗也是故素問方
伎之書而洪範方伎之流也知有洪範不知有素問
不知有洪範方伎之流也知有洪範不知有素問

儒者何
病焉



四川通志卷四十三